


DITÈÈKIIBWA ³

 ...-neetu Neville. Mwoyi wenu awu mu dinda emu, nwênù kalaasa. Tudi ne disanka dyàbûngì dya kwikala baalukile cyakabidi bwa kunusekelelaku cyakabidi mu Dîna didi dikumbàne mu byònsò dya Mukalenge Yesu adi. Ndi ne dyeyemena ne nwênù nudi bapicìle mu lumingu lwà butumbi lwà diMutumbisha ne lwà mabenesha.

² Anu mu dibwela mu dinda emu, mêmè kutwilangana ne mwânà mukese wa balume kaaba kàka ne yêyè kumpeesha kataata kakese kazòla Mwanjelo mulami mwikàle ùtàngila twânà tukese tubidi. Kadi ncivwa mumanye ne ki yêyè awu Daulton, Daulton mwânà wa balume mutekete awu to.

³ Ne mwab'ewu kwăpici ndambu wa mbingu anyi ndambu wa...Kùkaadi bu mbingu yibidi nanku awu, kùvwa taatù kampana, taatù mwena Kilisto, uvwa mulombe bwa mwanende nsongààkàjì wa citende uvwa kàyi mwanjì kwikala mwena Kilisto to, pàcivwàye mwimane mu mulongo wa babeedi. Ki Nyuma Mwîmpè kwambaYe ne: "Ndi—Ndi nkupeesha mwaneebe awu." Nenku's ki yêyè mwine mwânà wa bakaji awu mu dinda emu, musungidiibwe ne mubatijiibwe mu Dîna dya Mukalenge Yesu, musòmbe pa cibumba cya ku cyambilu, anu mùvwà Nyuma Mwîmpè mwambe amu. Ne bakwabo bânà mbasòmbe bònsò mwaba awu. Ndi mumanye ne dîkù dya Daulton didi ne disanka.

⁴ Ndi mmona inábànzà mutekete kwàka uvwabò benzele disambila bwa mwanèndè wa mu diboko mu dyalumingu dyàshàadi edi, uvwabò bèèla meeji ne ùvwa ùfwa awu. Ndi mmona ne mwânà awu ùcidi anu neetu mu dinda emu, ne twètù tudi ne disanka dyàbûngì bwa bwalu abu, mwaneetu wa bakaji. Bávwa bèèla meeji ne ùvwa ne disaamà dya misunya yènda yiteketa, kadi kàvwa naadi to. Pa nanku tudi ne kusakidila kwàbûngì.

⁵ Ndi mmona balunda beetu bàà bîmpè bònsò. Ndi mvuluka muntu mulume ewu pààkalwàye kùndi mu muyiiki wà pabwàwù wà babidi ku—ku Chautauqua musangu kampana, ngeela meeji mmùvwàbi. Twàkadyà neebe didya dya mu dinda pamwe ne mukajeebe ne bânà beebe, ngeela meeji ne civwa... anyi wèwè ne mukajeebe, anyi nne bânà beebe kabidi, eyowa's. [Mwaneetu wa balume kampana ùdi wàmba ne: "Middletown."—Muf.] Middletown, ku... Kadi tuvwa bònsò... Nyewu ngăpù mwoyi dîna adi, pa nanku mêmè ndi ndibiikila anu ne n'Chautauqua. Eyowa's, mukalenge. Bààbûngì bàà ku balunda bàanyi bàà bîmpè.

⁶ Mwaneetu wa balume Charlie Cox ne Mwaneetu wa bakaji Nellie bàdi kaaba aka aba, bàdi kúndi bu díkú dyànyì diibìdì, ne nwênù kanwenaku bafwànyìne kwikala cìngà cintu to anu bàrà bàànyì balela. Ntu nya kuntwaku, kwòkù aku nkúntù ntàmba kupicishila cikondo cyànyì cya dyololokaku, nkwòkù aku. Yèyè kí cilembi cya nshindi cya citàmbe bwìmpè bwa mu Kentucky pàndi mèmè nsanganyiibwa mu Indiana. Ne pa nanku Indiana... Nenu Charlie, ndi nkwambila ne ndi anu njinga bikole, ndyumvwa menemene anu bu ne bivwa bikèngelaku bwa mèmè kuya kakwataku ndambu wa mishipa ya kàpìteenà ayi anyì mishipa ya nkàlàshì ya tushoonyitushoonyi kumpala kwa mèmè kwasa lwendu bwa kukùya. Ndi bushuwa ndyumvwa anu bu ne ndi mufwànyìne kucitwala bikole.

⁷ Mwaneetu Parnell... Par-... Arnett, wa mu Lou-... Caroline du Sud. Nenu Mwaneetu... Ee, anu bààbùngì bashìlèshìlàngàne kaaba aka bàà ku myaba mishìlèshìlàngàne, bàdì balwe mu dinda emu bwa kutukumbulaku.

⁸ Nudi bamanye's, twètù katwena ne buumambàlà bwa pabwàbù kaaba aka to. Tudi anu ne bwobumwe bwa muntu ne mukwende, pàdì Mashi a Yesu Kilisto, Mwànà wa Nzambi, àtùkezula ku bubi bwònsò apa.

⁹ Mpindyewu, tudi munkaci mwa kwenza dilonga dilenga dya dikema, anu dya butumbi's. Ne tudi, nangananga mèmè ndi... mumanye ne, dìdì dìnshànkisha, ne ndi mumanye ne nwênù bònsò dìdì dìnshànkisha peenu. Misangu mikwabo ntu mbanga munda mwa dituku dijima, ngaakula pa cyòcì aci anyì mbala pa cyòcì aci, ngangata mvensa mitwe ku yibidi ne nditwa mu Mifundu, nenu katanci aka anyì, nkààdì muumuke ku Genese muye kwobeka ku Bwàkabuulwibwà, nya anu kuya.

¹⁰ Nenu, nudi bamanye's, ndi muswe kwangata cikondo citùdiku bafwànyìne—citùdiku bafwànyìne kwangata Mukanda wà—wà Ebèlù, ne kwangata anu bu mùdì... Ee, pààbangà movù wà nshindi, bu mùdì ngondo wa citeem-... lwà ku ngondo wa dikum-... wa mwandamukulu, nudi bamanye's, ne kutungunuka too ne ku cikondo cya kuya dyàmwàmwà dya mbù, anu diloolo ne diloolo dyònsò pa Mukanda wà Ebèlù, anyì Mukanda wà Ekèsòòdè. Mushindu wùvwà Nzambi, mu Ekèsòòdè, ùpàtula cisàmbà Cyèndè mu Ejiipitu, cimwangi's! Cifwànyikijilu cilenga cya dikema cyetu twètù mpindyewu biikàlè tudilongolola bwa cyetu cimwangi. Cìdì, kaa, cìdì ncintu cilenga cya dikema. Mifundu yònsò mu kaabujimà mmiswikakane anu pamwe, ne yìdì Bwalu-bulonda bunene bumwepele.

¹¹ Mpindyewu, bwa mu dinda emu tucìdì—tucìdì anu mu Mukanda wà... Tuvwa ne cya kwangata nshapita yisatu ya kumpala ya—ya Mukanda wà Efèsò. Mukanda wà kumpala wà

Pòlò mufundila beena Efèsò ku Efèsò, mwikàle ùteeta, mwikàle ùshikika ekeleeziya bilondèshile myaba. Nenku kumpala menemene kwa twètù kucilenga, tudiku mwa kwangata anu kasunsa kamwe anyì tubidi cyanàànà bwa disambila, kumpala kwa twètù kucyenza.

¹² Éyì Mukalenge, Nzambi wetù, tudi tubwela mu Bwikadi Bwebe mpindyewu, katùyikù bakùmbànyine mutùdi emu, kadi tudi bamanye ne kùdi Mulambu wà Mashi mwaba awu mwindile, mwikàle wùtùkezula ku bukooya bwònsò, ne mwikàle wùtùleeja kumpala kwa Taatù, katùyi ne cya ditùbanda naaci to, katùyi ne kalema to. Kakwena kantu nansha kamwe katùdiku bafwànyine kwenza bwa kukumbanyina ciine eci to. Kadi bwalu Yesu mmwenze cyòci eci bwetu twètù, tudi twinama ne kudipwekesha kwònsò ku Bwikadi Bwèndè ne Dìna Dyèndè, biikàle tulomba bwa Wèwè kutumaku Nyuma Mwìmpè munkaci mwetu mu dinda emu. Ne bu mùdìbi ne mèmè ncyèna mwena teoloji anyì mumanye mwa kutèèka Mifundu mu bulongame to, kadi mwikàle anu nzuka ne mwikàle ne dyanyisha pa kuumvwa Nyuma Mwìmpè pàdiYe ùdimwèneshila ku buumùntù bwànyì mèmè, swaku bwa Yèyè àtùbènèshè twètù bònsò patùdi tubala Dìyì Dyebe difunda apa, bwa kulwaDi kutùdi Mwoyi wà Cyendelele. Enzaku nanku, Taatù. Tudi tulomba nunku mu Dìna dya Yesu ne bwa bwalu bwa Yesu. Amen.

¹³ Mpindyewu ndi mufwànyine kwanji kwamba dyambedi mwómò emu ne, dìbà dyònsò dindi mufwànyine kwamba nì ncinyì nì ncinyì cyònsò cidi cifwànyine kwikàla cìbèngangana, kaciyi cisòmbà bìmpè to, pàmwàpa kakùyi mpatà to ciikàle cibi bilondèshile wenù ndongèshilù, anyì cintu kampanda cyùdi kùyi mufwànyine kwitaba to, mèmè ndi mutwishiiibwe ne Nyumà Mwìmpè, Yèyè neacivwije citwè mukele ne citwè nsukaadi mu mushindu wà ne kakwàkwikalakù...kakwàkwikalakù cilendwishi to nansha cikese. Nwamonu anyì? Ne neciikalè—neciikalè ku dinanga ne ku bwobumwe, bwa ne cidi . . . Cidi mmu meeji awu mùdici cyambiibwe.

¹⁴ Nenku byònsò ebi mbibange ne diyishi dya dyalumingu dishààle, ngeela meeji ne mmùvwàbi, mu dinda dya dyalumingu dishààle, dya *Mfùmù Mubèngùibwe*. Kùdikù muntu ukàadi ne mukaba wà mèyi awu anyì? Ngeela meeji ne bàdi naayi, ne nudi mwa kuyipeta panwikalà nuyijinga: *Mfùmù Mubèngùibwe*.

¹⁵ Mpindyewu anu mu matuku makee cyanàànà netubangile ku . . .mu Middletown mwàmwa, mu Ohio. Tudi baswe bwa aba bònsò bàdi ne diikisha dyabo—dyabo dilongolola bwa ciine cikondo aci bìikalè batwishiiibwe bwa kudisangisha neetu kuntwaku, bwalu tudi tutekemena cikondo cilenga cya bwobumwe mu Middletown, mu Ohio. Docteur Sullivan yèyè ngudi mfumu, ngeela meeji, wa comité. Ne nekwikalè maloolo ataanu bwa cyòci aci, mèmè nènyiiishè bu—bu mwakudi mubiikidiibwe ku Mpungilu wa Buloba bujimà wa Ekeleeziya

wa kàyi ùsungulujangana bilondèshile cyena Mangumba awu. Ne dībà adi—dībà adi paanyima pàà cyôci aci, nekwikalè dyetu disangisha twètù biine kubangila dībà adi. Tudi bacìlongòlòle bwa kuyaci too ne ku matuku a ngondo dikumi ne abidi, kadi biikàle bùumvwangane ne tudi mwa kutungunuka too ne mu lumingu lukwabo paanyima pàà cyôci aci, biine abi biikàle anu bilààle ku mushindu wàlombolà Nyuma Mwîmpè awu. Twètù bônso tutu baswe kulombodiibwa kùdì Nyuma; anu cidì Nyuma wàmba bwa kwenza aci, dībà adi kucyenza ne lukasa lwônso.

¹⁶ Nénku tùvulukàayi patùcìdì tutumikila Nyuma apu ne, dileesònà dinene ditùdì baswe kuyiila ndya ne, katwikadikù tulwijakaja to. Nwamonu's, angataayi dībà dyàbùngì, ikàlaayi ne diitabuujà. Twètù balòmbe Nzambi cintu kampanda, kuvuluka ne, Nzambi ùtu wàndamuna disambila. Yèyè ùtu ùcyènza mu cikondo Cyèndè Yèyè, mushindu wùdici citàmbe bwîmpè awu, ùcyènza anu bwa kwikalaci cikumbànàngane bwetu twètù. Kadi pìikalàbi kabìyi nanku to, dībà adi citùdì twenza kaaba aka mu dinda emu ncinyì? Ncinyì—ncinyì citùdì tulakila mukana twamba mutùdì beena Kilisto? Nzambi . . . Eci cyôci kaciyi Diyì dya Nzambi to, dībà adi kì nDilelela nansha, dībà adi's tudi tusanganyiibwa bàà munkaci mwa bantu bàdì batàmbe kwikala bakengeledi bàà luse.

¹⁷ Mémè ndi ne disanka dyàbùngì dya kwikala musangishe mwoyi wànyì pamwe ne bààbùngì kaaba aka bàdì bamanye ne Eci n'Diyì dya Nzambi didì kadìyikù mwa kupangila to. Nénku Dyòdì, Dyòdì didì Diyì ne Diyì dyônso anu Bulelela, Diyì ne Diyì dyônso dyàCì, katùpà kààDì kônso. Ne ku ngàsà wa Nzambi, mvwaku mupete dyèsè dya kumona Buloba butwàsà lwendu bwa kuya dîngà dituku.

¹⁸ Makeelela (Bantu kabàtu bamanye ne mbikondo kaayi bya dibungama dikole bitù bilwa pamwe ne mudimu wà bwambi wà mushindu ewu to), mvwa mubungame anu menemene, kì mémè kwambila mukàjàànyì ne: “Mémè nkààdi ne dijinga dya kukwata njila kuya mwine.”

Yèyè kwamba ne: “Cyùdì wambidila nanku ncinyì, Bill?”

Mémè ne: “Kaa, panwapa ndi ne ntatu ne bikwabo.”

¹⁹ Nénku kwenzekabi dībà adi anu bu ne Nyuma Mwîmpè wàkamba ne: “Udi muswe kubicinguluka anyì? Udi—udi ukeba bwa kubyepela anyì?” Nwamonu anyì?

²⁰ “Bwàlà,” mûngààkambà, “ndekèlè anu ngiïmanè kumpala kwabi byônso bwa nkungamangane naabi. Nwamonu's, anu . . .” Nwamonu anyì?

²¹ S'mbitàmbe bwîmpè's. Ne meeji matooke ônsò, mu bulelela, ndi ngamba nunku cîndì mudimwene ne àànyì abidi, cya ne paanyima pàà mwoyi ewu mumane kujika, tudi tubwela mu Buloba bùdì dyàmwàmwà dya cyônso cidì ní nganyì ní nganyì

mufwànyìnekù kwelela meeji aci. Ne kwòkù beenyi kaaba aka, ndi mutwishibwe ne kanwena. . . Ndi ndomba Nzambi bwa kanwikadiku nwâlwa kungangata bu mukoleshi wa maalu to. Ndi—ndi muswe ne, kwòkù cintu kampanda, nkwikala ne meeji matooke ne kwamba Bulelela. Kadi mbifwànyine kwikala ne dikwacisha kùndi ku cinyi bwa kwamba cintu kampanda cya mafi pàdiku—pàdiku búngi cyanààna kaaba aka bidì Bulelela? Twètù, bwa cinyi bikèngela bwa twètù kwamba cintu kampanda cya mafi pa bwalu abu? Nwamonu anyi? Cyòci aci, s’Cidi anu Bulelela.

²² Nenu, kabyena bikèmesha to, ndi ngiitabuuja ne Pòlo wàkambwibwa mu dyulu diisâtù, ne wàkamòna bintu bivwà kabìyi kwamba. Kadi dîngà dituku wàkamba ne: “Bidì dîsù kadìyi dyanjì kumona, bidì dicì kadìyi dyanjì kuumvwa, anyì bidì kabìyi byanjì kubwela mu mwoyi wà muntu, bidì naabi Nzambi (mu cibucilu) bwa aba bàdi baMunange.”

²³ Kaa, twètù’s tudi basòmbèle. . . Tudi basòmbèle mu mushiki wà bukooya pànwapa apa, ki cyònsò cidìku, anu mushiki wà lukutukutu mùle tente ne— ne mwìshì wà ku bukooya mwikàle wòshika bitekete bitekete. Wà. . . Nansha twètù katùyi tuditàmpakajanga naabi twètù biine, mu byòbi abi mmutùdi basòmbèle, mùdi mwìshì wùfùmina mu makàlà a mudilu a mpekaatu ya yifwima mìshì. Cimwe cya ku bintu bidì bitàmba kwendeshangana ku mwoyi cìndìku mèmè ewu mwa kwelela meeji, s’mmushiki wà bukooya bwa mu cimenga munkaci mwa kwoshika’s. Kacya wèwè ukààdikù mufike pabwìpi ne cya nanku awu anyi? Mupuuya mubyàmùbyàlè, mutàpile twìshì wà mwìshì wùdi wùfùmina mu bukooya bwa mishindu yònsò awu. Nenu—nenu wèwè weyela cyòci aci, s’neciikalè anu cikukùvumuna myoyi ya munda.

²⁴ Ndi mvuluka pàakakèngelàbi bwa mèmè kuya mu New Albany, lwà ku. . . kwinshi kwa Mùsèsèsù wà Dikumi ne mwandamukulu, kùvwa kale wàwa kùsanganyibwà mushiki wà kale wà bukooya, bivwa bikèngela bwa mèmè kukùya bwa kwenza mudimu wà dyangata mafutu kuntwaku ne kubala ma compteurs. Ne mwya anu nciina bikole dituku adi pàvwàbi ne, nnjila wa dikumi ne mwandamukulu awu, pàvwàbi bikèngela bwa mèmè kenza mudimu awu muntwamu, bwalu bivwa ne cya kutùma mupùya mubyàmùbyàlè awu. Kadi nansha nanku, mwaba awu wùvwa wùsanganyibwa mibidi ya mpuku ne mbwa ne bikwabo byònsò, nudi bamanyè’s, yivwa yifwima ne mwìshì wà kale awu wùbàndilamù.

²⁵ Mpindyewu, nansha nanku, ki cyòci aci citùdi tufwànyikija ne mwoyi wà panu ewu, wà mwìmpè menemene awu. Ciikàle anu cìfwima mìshì, mpekaatu ùnunkakana myaba yònsò, mutùdi mwa kwamba, mu ngaakwilù wa nyuma. Kadi, kaa, mwaba wùdi lupeepele lùtuutakù ludilekèlèle, ne byònsò biikàle bilenga ne ditalala ne disanka ne Mwoyi wà Cyendeleele, anu dyàmwàmwà

dya musulu menemene. Kadi tudi mu mvita, pa nanku katwikadi anu badyādiye panshi twamba ne: “Tūlwijakajāāyi bwa tukafikè dyāmwāmwa” to, twāngatāāyi yōnsò utūdi mwa kwangata awu bwa twamona mwa kamufikisha dyāmwāmwa. Eyowa.

²⁶ Nenku mpindyewu kiipàcilà kàà màleesònà aa nkàà kwelesha lwongò aba bàkaadi bamanè kusabuka baye mu Buloba abu. Kiipàcilà kàà cyòci eci, kàà dilonga dya Mukanda wà Efèsò ewu edi, nkàà kushikika ekeleeziya bilondeshile myaba mwaba wà kakūyi mpatà to wūdiye mwimanyine mu Kilisto. Ncifwanyikijilu cya Dipungila Dikulukulu ne Mukanda wà Yoshùwà, mùvwà Yoshùwà mwabanyinangane myaba amu. Mu dyalumingu dishàale tuvwa bacilongè, mùvwà Yoshùwà mwabanyine muntu ne muntu buloba. Ne yèyè wākacyènza ku disonsodiibwa.

²⁷ Mushindu wùvwà Mòsà...mupatule cisàmbà aci mu Ejiipitu, matungulu a ayè, pwârô, mubàpàtùlemù, ne mubàpèèshe mwaba wàkalayà Nzambi bidimu nkama yinaayi paanyima...anyì bidimu nkama yinaayi kumpala, bwa ne Yèyè wàlwa kubàbweja mu mwaba kampana, buloba bwìmpè mùvwà mabèèle ne bwìci bituuta nkòkà. Ki Mòsà kulombolaye bānà bāà Izaleela abu too ne ku buloba abu, kadi kàyi mubāsabwìshà ne kubafikisha dyāmwāmwa to.

²⁸ Kadi Yesu, bwa cisàmbà cya nyuma, bìikalà mwa...bātu batùlayè twètù Nyuma Mwìmpè kacya anu ku cibangidilu, Yesu mutùlombòle too ne ku mulayi. Kadi Nyuma Mwìmpè mmulwe, bu Yoshùwà, bwa kuya kakwata ne kulombola ne kuludika ne kwangata buloba abu, anyì kukwata ekeleeziya bu wendè. Tudi tusangana, mu mushindu wà bishimikidi, dībà adi, ne, mu wetù... .

²⁹ Mpindyewu mwaba ngwôwò ewu, pāmwapā, wūdi bantu bafwānyine kwela meeji ne ndi ne cyakwidi cikayabale ne nteeta bwa kukèeka bānà beetu. Kí nnanku to! Nzambi ikalèku Mulumbulwishi wanyì, kī nnanku to. Nwamonu anyì? Ndi nteeta anu bwa kufunkunaku cintu kampana cidi Bulelela. Nwamonu anyì? Twètù tudi basungule balombodi, bāà bantu, pamutu pāà bulombodi, balombodi, bulombodi bwa Nyuma Mwìmpè. Tudi baswe bwa bantu bātṽbānyìnè cyetu citùpà ne bātùlombòlè, mangumba bu mùdi ba-Méthodistes, ba-Baptistes, ba-Presbytériens, ba-Luthériens, Église de Christ, beena Mpenta, ne mangumba mashiilèshiiàngàne, bwa kutèeka bulongolodi kampana dyenzè bu ne ki cileejilu, ne twètù tulonda ciine aci. Kadi twètù tudi... .

³⁰ Kaaba nansha kamwe mu Bible kabyenaku bìkèngela bwa twètù kwenza cintu bu nanku nansha. Kakwena Mufundu nansha wumwe, mu Bible mujimà wa Nzambi, mùkaadiYekù muvwije ekeleeziya bulongolodi anyì mùkaadiYekù nmwambe bwa bulongolodi kampana nansha, kaaba nansha kamwe mu

Bible. Kàdi misangu yònsò anu bibèngàngàne naaci. Yèyè kí mmuswe bwa twètù kwikala benjiibwe mùdi bintu bya pa buloba to. Yèyè mmuswe bwa twètù kwikala bàà pabwètù, batèèka ku luseke.

³¹ Mpindyewu ncyêna njinga kwamba ne mbwà kwikala “mukutakane” to, mutùdì tucibiikila. Ndi njinga kwamba kwikala cisàmbà cibìikidiibwe bwa kupatuka, kaa, ditunga dya cijila dibènèshiibwe, dya bantu biikàle ne nsòmbelu yidi kumutu kwa bundu, biikàle twenza maalu, tuditwàla anu mùvwàYe Yèyè mufwànyine kuditwala, ùkwàta mudimu munda mwetu, bwalu twètù tudi mudimu wà byanza Byèndè, bafùkiibwe mu Kilisto Yesu bwa byenzedi bimpè.

³² Mpindyewu, mu diisàtù diloolo, bààbùngì bàà kunùdi kabàvwapù mu diisàtù diloolo to, kadi tuvwa babwelè mu . . . ngeela meeji ne mmvensa mwi3 anyì . . . To, mmvensa mwi5.

. . . *ku ditèèkiibwa*, anyì dishikikiibwa dya cisàmbà . . .

³³ Mushindu wùdi Nzambi, ùteeta bwa kushikika cisàmbà Cyèndè, ne pàdì Nzambi ùshikika umwepele, díbà adi, kaa, ekeleeziya yònsò mujimà ùswa bwa kwikala mùdì umwepele awu, kwikala ne bintu bya mushindu wumwewumwe awu, kwenza bintu bimwebimwe abi. Tudi basongiiibwe bishiilàngàne, tudi benjiibwe bishiilàngàne, tudi benjiibwe ne ngiikàdilu mishiilàngàne, ne tudi bashikikiibwe myaba mishiilàngàne, muntu ne muntu bwa mudimu mushiilàngàne; pàmwàpa umwe bwa mudimu wà mushindu anu mukese menemene, mukwabo bwa mudimu munene. Ngeela meeji ne ùvwa n’Davidi anyì umwe wa ku baprofeta, nyewu ngápù mwoyi mpindyewu, wákamba ne: “Mbipiciibwe ne mèmè mwikàle cituutwidi cya makàsà cya ku Nzubu wa Mukalenge, pamutu pàà kwikala . . . kwikala musòmbèle mu ntenta pamwe ne beena lwonj- . . . beena lwonji.”

³⁴ Mpindyewu netwànji kwimanaku anu kakese pa ditèèkiibwa, mvensa mwi5, tuteeta bwa kwenda kupweka kwinsi ne mwetu mwònsò. Kadi mpindyewu nwavulukaayi cyena-bwalu, cyònsò cidi anu pa dishikikiibwa. Mbanganyì bàdi bumvwe aci? Twànji kuumvwa nucyàmba bònsò pamwe: “Kushikika Mubidi wà Yesu Kilisto bilondèshìle myaba mu Kilisto mùdì Nyuma Mwímpè ùtùlombwela.” S’ki bwalu mbwòbù abu, bwa mpindyewu kaayi twacyùmvù, nwamonu’s. Kutushikika bilondèshìle myaba, Mukanda wà Efèsò ngùdi ne cya kwenza aci.

³⁵ Nenukù tàngilàayi mulongeshi wa cikunda ewu, Pòlò. Cintu cya kumpala cidìye wènza ncyà kutònkola mmwènenu yònsò wa didìshìnda ne diya lwònsò awu. Kutonkola mmwènenu yònsò wa “kwikala mwena Kilisto leelu kadi maalaba ndènduka, ne dyàbwàbwa Nzambi ùmpiisha ne dituku didì dilondà

ndèwuluka.” Ki lukutukutu ndwòlò alu! Mpindyewu eci cidi. . . Mukanda ewu kî ngwà bàmbila beena dilongesha dya butangadiki, mayiisha a batangadiki to. Twêtù katwena. . . Mémè nci tu ndenga cyòci eci mu budimi bwa bwambi to. Ndi ntwadila ekeleeziya eci, bwalu Pòlò wàkacyàmbila bansantu, aba bàdi babìkidiibwe ne balamiibwe, ne buujìbwe ne batèèkiibwe ku luseke, ne biikàle mu Nyuma Mwímpè, bamanè kwikala mu Buloba bwa Kaanàànà. Yèyè ùdi ùteeta bwa kubambila bôbò, cintu cya kumpala ne, kuumusha mu meeji ebe amu ne neujimine ne newènzè *cikampanda*, ne udi ne bwôwà bwa *cikansanga* to. Kwikadiku ne bwôwà bwa cintu nansha cimwe to, bwalu yèyè ùdi ùteeta bwa kukwambila mwaba wùdi, wèwè udi nganyi, mushindu kaayi wùdi mwimane.

³⁶ Mpindyewu, udi mufwànyine kwenza bintu bibi, ne musangu wònsò wùdi wenza cintu cibi wèwè neucipetele difutu. Eyowa’s, mukalenge, wèwè’s neupoole cyùdi ukùna aci! Kadi aci kacyenaku citàngila lupandu lwebe to nansha kakese. Paùdi ulediibwa ku Nyuma wa Nzambi, wàpeci Mwoyi wà Cyendeleele ne kwèna mwa kufwaku to anu mùdi Nzambi kàyikù mwa kufwa amu. Wèwè udi citùpà cya Nzambi, udi mwànà wa Nzambi.

³⁷ Mémè ndi mulediibwe Branham. Wèwè udi mufwànyine kundamika dîna dikwabo kampanda. Dîna dikwabo kampanda kadyàkwenzakù bwa mémè kubènga kwikala yèyè awu to, ndi anu Branham. Ndi mulediibwe Branham, nèngiikalè misangu yònsò anu Branham. Nèngiikalè. . . Ndi mwa kupeta kwîsù kunyangakaja kwònsò dîngà dituku, kukònyangaja kùdi binyoka, mupeteke njiwu ne musùnsula yònsò mu mushindu wà mmwènaka anu bu nyama, kadi nèngiikalè anu Branham! Bwa cinyi? Mashi a Branham àdi munda.

³⁸ Ki cyùdi wèwè awu. Nenu bu mùdibi ne Nzambi mmukwenzè. . . Mpindyewu vùlukàayi ne, bàndi ngambila kî ng’aba bàdi pambelu pàà Kilisto to. Ndi ngambila aba bàdi mu Kilisto. Wèwè udi ubwela munda mwa Kilisto bishi? “Ku Nyuma umwe!” N-y-u-m-. . . ne dileeta dinene mbwena kwamba ne: “Ku Nyuma Mwímpè umwe nkutùdi bònsò babàtiibwe mu Mubidi wumwe.” Mmunyi mutùdi. . . Mmunyi mutùdi tubwelamu? Nku dibatiiza dya mâyi anyi? Mushindu mwine wùndi nciyi mpetangana ku méyi ne nwènù ba-Baptistes ne nwènù beena Église de Christ’s wè. Kî nku dibatiiza dya mu mâyi to, nansha kakese! Kolinto wa Kumpala 12, mmwambe ne: “Ku Nyuma umwe, Nyuma Mwímpè, nkutùdi babwejiibwe mu Mubidi awu.” Ne tudi mu dikubiibwa anu mùdi wòwò Mubidi awu mu dikubiibwa amu. Nzambi ùdi. . . ngudi mucilaye.

³⁹ Mmunyi mùdiku Nzambi mufwànyine kuMulumbulwisha cyakabidi, pàdibi ne Yèyè wàkamana kuya ku Kalvariyo? PàvwàYe wènda ùbànda mutangile ku Gològòtà, Wàkatuuciibwa, kuzaajiibwa, Kàyikù mwa kwondopangana to, biMukolela ni bwa kwamba nansha diyi. Bwa cinyi? Uvwa

mwambule mpekaatu ya bàà pa buloba pambidi Pèndè. Kí nne mbwalu Yèyè ùvwa ngènzàmpèkààtu to, kadi “Wàkavwijiibwa mpekaatu” bwànyì mèmè ne bwebe wèwè. Mpekaatu yònsò ya bàà pa buloba kuumukila anu ku Adama too ne ku Dilwa Dyèndè, yivwa pa dikaaya Dyèndè. Ne Nzambi kàvwa munkaci mwa kunyooka Mwan’Ende to. Ùvwa ùnyooka mpekaatu. Nudi numona mùvwàci cibyaçibyaèlè anyi? Ùvwa munkaci mwa kwenza mulambu wà kujimija naawu mpekaatu. Ùvwa munkaci mwa kusebela njila wa dipandukila bwa aba bònsò bàvwà Nzambi mumanye, ku didyànjila-kumanya Dyèndè ne, bòbò nebalwe. Netubwele mu cyòci aci mu tusunsa tukese emu.

⁴⁰ Mpindyewu, díbà adi, panùdi ne “ku Nyuma umwe nkutùdi babàtiijiibwe mu Mubidi awu, Mubidi wumwe, wùdi Kilisto,” ki patùdi mu dikubiibwa kashidi.

⁴¹ Mpindyewu, mwaba awu ngùdici cimwèka bu ne cidi cìtuuta mu mushindu wà pabwàwù, nangàngà beena—beena—beena kwitabuuja bàà ba-Arminiens, bwa ne bàdi. . . bikèngela bwa kwikalabo bènzakù cintu kampanda bwa kudikumbanyinabo bòbò biine, anyi cintu kampanda cya didikumbanyina. Mmunyì mùdici mwa kwenzekaku ku bintu bibidi musangu wumwe? Cidi anyi ku ngàsà anyi ku byenzedi, cimwepele. Kacyena mwa kwikala ku cintu cimwecimwe aci, ku bintu bibidi bishiùlàngàne to; bikèngela cìikalè ku cimwepele. Cidi. . .

⁴² Mèmè, ekelekele, mèmè ncyèna anu mwa kumona cingà cintu to anu ngàsà wa Nzambi. Ki mwànyì mùndi mwenjiibwe. Ntu misangu yònsò anu mwitabuuje ngàsà. Mèmè ndi anu ngàsà pa yèyè, kwajiki. Kabyena ne mèmè ndi—ndi. . . nansha mu wanyì nsòmbelu, pàncivwà mwànà, ncìvwakù mwa kumona cintu nansha cimwe to, anu ngàsà, ngàsà. Bàtu bàmba ne: “Mèmè—mèmè nèngiikalè. . . Ùnkoonyè paanyima, nenku mèmè nènkuoonyè pàànyì.” Ee, adi’s ncyakwidi cya bwalu bukole be. Kadi bwànyì mèmè nansha wèwè munkoonyè paanyima anyi kùyi munkoonyè to, piikalàbi ne paanyima peebe pàdi pàlòmba dikukoonya, nansha bishi mèmè nènkuoonyè. Nwamonu’s, ngàsà. Eyowa’s, mukalenge. Nwamonu’s, ngàsà ùdi ùkwàcila mudimu ku dinanga. Pawikalà nende dijinga’s! Nansha byòbi ne wèwè kutu mwanji kungenzelaku mèmè cintu nansha cimwe to, ncyèna—ncyèna neebe bwalu nansha bumwe to, wèwè naaci dijinga mèmè nèncyènzè nansha bishi. Ngàsà! Bwalu’s wèwè udi naaci dijinga!

⁴³ Mvwaku dijinga ne disungidiibwa. Kakùvwakù cintu nansha cimwe cìvwà mwa kunsungila to. Kakùvwakù cintu nansha cimwe cìmvwà mwa kwenza bwànyì mèmè mwine to, ncìvwakù mwa kudisungila mèmè mwine to anu mùdibi ne kakùvwakù cya dyenza nansha cimwe to. Kadi mvwa dijinga ne disungidiibwa, bwalu mvwa mwitabuuje ne Nzambi ùdikù. Ki Nzambi kutumaYe Mwan’Ende, muvwijiibwe mu cimfwànyì cya mubidi wà bubu, bwa kukenga pa kaaba kàànyì, nenku mèmè

kusungidiibwa, musungidiibwe ku ngàsà nkààyèndè. Ncìvwakù mwa kwenza cintu nansha cimwe to, anyì wèwè awu, bwa kudisungila wèwè mwine. Nenku aba bààkadyànjlàYe kumanya kumpala kwa difuka dya dyulu ne buloba . . .

⁴⁴ Tuvwa babwelemu, mu diisâtù dishààle. Tuvwa badifwànyikijile Nzambi mu Elah, Elohim Wendè, ne baleejè ne Yèyè ùvwa wikalakù nkààyèndè. Kadi munda Mwèndè mùvwa buuTaatu, munda Mwèndè mùvwa makumbanyina kabùkabù, bu mùdì Musungidi, bu mùdì Mwondopi. Byònsò abi bìvwa mu Nzambi amu, kadi Nzambi ùvwa wikalakù nkààyèndè. Kadi bu mùdìbi ne Yèyè ùvwa Musungidi, Yèyè ùvwa Taat- . . . Yèyè kàvwa ne Mwanjelo, Kàvwa ne cintu nansha cimwe to. Kakùvwakù cintu nansha cimwe to anu Yèyè nkààyèndè. Yèyè ùvwa wikalakù nkààyèndè. Cintu cikwabo nansha cimwe kacìvwa cìikalakù to anu Nzambi.

⁴⁵ Kadi bu mùdìbi ne Yèyè ùvwa Nzambi, dìbà adi kùvwa ne cya kwikala cintu kampanda bwa kuMukuukwila, bwalu Yèyè ùvwa munange dikuukudiibwa. Ki Diikalaku Dyèndè Yèyè mwine kufukadi bifùkiibwà bwa kuMukuukwilabi. Mpindyewu, bwa katanci kípì, twánjàyibì kucilenga cyakabidi, bwa katanci kípì mpindyewu, katwakukenketa cintu cyònsò mu kaabujimà to, kadi nenucipetele pa mukaba wà mēyì. Kadi dìbà adi bwalu Yèyè ùvwa Nzambi, Yèyè wàkafùka Banjelo, ne Banjelo bàvwa bàMukuukwila. Banjelo bàcìdì anu bàMukuukwila. Mona's, Banjelo bàdì biimàne mu Bwikadi bwa Nzambi abu bàdì ne asambombo, mapwapwa a mwomumwe, mapwapwa asambombo. Bàdì bàtèeka abidi kwisù, abidi ku makàsà, ne bàbùuka ne abidi, mu Bwikadi Bwèndè, bèèla mbilà muonyè ne bufuku ne: "Wa cijila, wa cijila, wa cijila, Mukalenge Nzambi wa Bukole bwònsò." Aci ncìdì Mufundu wàmba. Bàvwa bàMukuukwila, mpindyewu aci kufùkacì cintu kampànda bwa kuMukuukwila.

⁴⁶ Nenku munda Mwèndè mùvwa cyambiibwà cya Musungidi. Mmunyì mùvwà cimwe cya ku Bifùkiibwà abi, pàvwàku kakùyikù nì mmpakaatu nì mmeeji a mpekaatu, mmunyì mùvwà cimwe cya ku Byòbì mwa kujimina? Kabìvwakù mwa kwenzeka to. Pa nanku bìvwa bikèngela bwa kwikalakù cintu kampanda cyenza cìvwà mwa kujimina, bwa kumonaYe mwa kwikala Musungidi. Munda Mwèndè mùvwa Mwondopi. Nudiku nwitabuuja ne Yèyè m'Musungidi anyì? Nudiku nwitabuuja ne Yèyè m'Mwondopi anyì? Kadi bu ne kakùvwakù cintu nansha cimwe cya kusungila anyì cya kwondopa? Nwamonu's, bìvwa bikèngela bwa kwikalakù cintu kampanda cyenza mushindu awu.

⁴⁷ Pa nanku mpindyewu, Yèyè kààkacyènzakù mushindu awu to, kadi Wàkatèeka muntu pa budishikaminyi bwa disungula ne: "Wèwè mwangate *cikampanda* udi ushààla ne mwoyi, wèwè mwangate *cikansanga* ufwàfwa." Nenku muntu yònsò udi ulwa

pa buloba ùcìdi anu mutèèkìibwe ne cintu cimwecimwe aci. Nzambi, ku didyànjila-kumanya Dyèndè, ùvwa mumanye ne uvwa mwa kucyenza nganyì ne uvwa kàyi mwa kucyenza nganyì. Piikalàbi ne Nzambi ùdi . . .

48 Lukonko alu lùvwa lwediibwe kùdi mwena teoloji kampana, mulungeelè mèmè, udi ùlwa mu masangisha àànyì anyì udi utèeleja mukàbà wà mèyi, kwambaye ne: “Lukonko lumwe!” Yèyè ne: “Dìbà adi Nzambi ùdi kwònsòkwònsò anyì? Dìbà adi,” yèyè ne, “Yèyè ùdi mwa kusanganyiibwa myaba yònsò anyì?”

49 Mèmè kwamba ne: “Yèyè kèna kwònsòkwònsò mu mushindu wùdi mwaku kwònsòkwònsò wàmba amu nansha. Yèyè kèna mwa kwikala Kampana ne pashiishe kwikala kwònsòkwònsò to. Yèyè mwikàle kwònsòkwònsò, bwa cinyi bìdi mufwànyine kusambila bwa kupeta Nyuma Mwìmpè? Yèyè mwikàle kwònsòkwònsò, Yèyè’s muuje mutanta wònsò, ditumba dyònsò, kaamutanta kakese kònsò, kabulu kàà mashi kònsò, kalanjilanji kònsò, bintu bikwabo byònsò bidìku ebi.” Mèmè ne: “Mbwa cinyi bwàkayàYe wènda ùkèbanganana ne Mòsà, ku kantentà, piikalàbi ne Ùdi kwònsòkwònsò? Mbwa cinyi bwàkanyeemakanàYe eku ne eku kwa budimi bwa Edènà, wènda wèla mbilà ne: ‘Adàmà, Adàmà, udi penyì?’ piikalàbi ne Ùdi kwònsòkwònsò?”

50 Yèyè ùdi kwònsòkwònsò bwalu mMumanye byònsò. Yèyè mmumanye byònsò bwalu Kèna ne mikàlù to, kwikala kàyi ne mikàlù kùdi kuMuvwija kwònsòkwònsò. Kwikala kwònsòkwònsò, dìbà adi, kwikala kàyi ne mikàlù, dìbà adi, Yèyè mmusòmbe mu Maulu. M’Musòmbèle mu mwaba kampana bwalu Yèyè ùdi Kampana.

51 Kadi, mwikàle kàyi ne mikàlù, dìbà adi Yèyè mmumanye bintu byònsò. Mmumanye dìbà dyònsò didi kajijijijiji kàtuuta mupodi. Mmumanye lubulubulu lwònsò, kwònsò kùyaayàlu kabwela mu mulundu bwa kupeta bwìci bwàlù. Mmumanye mushààmushà wònsò wùdi mwikàle ku mucì. Mmumanye meeji ònsò àdi mu mutu webe amu, bwalu Yèyè kèna ne mikàlù to ne mmumanye byònsò. Mbwena kwamba ne, Yèyè kèna anu Wa kàyi mikàlù to, Yèyè mmumanye byònsò, Mmumanye kantu ne kantu. Kadi Yèyè ùdi Kampana, Nzambi ùdi Kampana, ne mu Kampana ewu amu ki mwàkabangà kupatula byòbì ebi.

52 Neku mpekaatu, mùmvwà mwambe diloolo adi, mpekaatu kì mbufuki to. Kakwena cintu nansha cimwe cìdi cifùkìibwe to pa kuumusha bupwàngàne. Nzambi wàkafùka bintu byònsò biikàle bìmpè. Mpekaatu kì mbufuki to. Bàkaadi bambàmbe ne: “Ee, aci’s ki bufuki mene bwa mpekaatu.” Nukàadi bumvwe aci. Kadi aci nntùpàkànyì. Mpekaatu. . . Kùdi Mufuki anu umwepele, n’Nzambi. Nzambi kàvwakù mwa kufuka mpekaatu to, bwalu Yèyè ngwa cijila ne kakwena cintu nansha cimwe munda Mwèndè bwa kucyenza to. Mpekaatu ndinyangakaja; kì

mbufuki to, kadi ndinyangakaja. Masandi ncyenzi cyakane cinyangakaja. Mashimi mbulelela bwamba bibi. Mpekaatu kanà yònsò ewu, mpekaatu kanà yònsò ewu mbwakane bunyangakaja.

⁵³ Nanku mpindyewu, Nzambi mmusòmbè. Ùkaadi mumane kuDimwenesha, Ùdi Nzambi. Ùkaadi mumane kuDimwenesha bu Musungidi, bantu bààkajìmina ne Yèyè kubasungila. Ùkaadi mumane kuDimwenesha bu Mwondopi. Cìdì bantu bàmba ne ncìdìYe aci kaciyena ne cìdìci cìshintulula to; kadi Yèyè, nansha bishi, ùdi anu umwèumwè awu. Yèyè ùdi Mwondopi, Yèyè ùdi Musungidi, Yèyè ùdi Nzambi, Yèyè ùdi wa Cyendelele. Ne Yèyè ùdi ne kiipàcilà. Ne kiipàcilà Kèndè kàwva, ku cibangidilu, kàà kwenza bifùkìibwà bìvwà mwa kuMunanga ne kuMukuukwila.

⁵⁴ Nenku Yèyè wàkenza bifùkìibwà, kadi bifùkìibwà byàkadishinda. Nenku pashiishe Nzambi, ki dibènga kwikala Dyèndè dya ne mikàlù adi, kupwekeshilaYe mèsù mu nkwaka wa bikondo ne kumonaYe muntu yònsò uvwa ne cya kusungidiibwa awu. Muntu yònsò, Yèyè ùvwa mucimanye ku didyàn-jil-... ku didyàn-jila-kumanya. Ki bwa cinyi pìikalàbi ne Yèyè, ku didyàn-jila-kumanya, ùvwa mumanye ne nganyi uvwa mwa kusungidiibwa ne nganyi uvwa kàyi mwa kusungidiibwa, Yèyè's ùvwa mwa kudyàn-jila kulongolola. Pa nanku, mwaku awu kì mmwaku anu mubi to twamb'eku twamb'eku, mmwòmò anyi? Yèyè ùvwa mwa kudyàn-jila kulongolola, bwalu Yèyè ùvwa mumanye ne nganyi uvwa mwa kusungidiibwa ne nganyi uvwa kàyi mwa kusungidiibwa. Ki bwa cinyi, bwa kubakula aba bàvwà mwa kusungidiibwa, bìvwà bikèngela bwa kufilaYe mulambu wà—wà kujimija naawu mpekaatu yabo. Kaa, twètù ne mushindu, tudi baswe kukùfika, anu mvensa mikese cyanàànà kwinsu aku. Yèyè wàkadyàn-jila kutulongolola ku Mwoyi wà Cyendelele, mumanye aba bààtèèkà ku luseke bintu byònsò, nansha mùvwàci cifwànyine kumweka cya kaciyi cya dicyuka dya maalu bwa bânà bàà pa buloba amu, kacìvwa cifwànyine kwikala ne mushinga nansha mukese bwabo bóbò to, bwalu bàvwa bânà bàà Nzambi. Ki kubabiikilaYe.

⁵⁵ Ki kutumaYe Yesu, bwa Mashi Èndè kwikalawu difuta dya cibawu, difuta dya cibawu ku Mashi, bwa kwenza difila dya mulambu wa kujimija naawu mpekaatu, anyi dii—diitaba, anyi dikezula. Njila wa dikezula bwa dîbà dyònsò. . . Kaciyi musangu anu wumwepele ku ditabuluja dimwepele to, kadi “mwikàle ne mwoyi bwa kashidi, wènza dyakwilangana,” bwa mwena Kilisto kwikalaye mulamiibwe mukezuke muunya ne bufuku. Ki Mashi a Yesu Kilisto ngòwò awu àdi ènza dii—diitaba pa nkuruse pààpa, ku. . . mu Bwikadi bwa Nzambi, àdi àtùkezulà dîbà dyònsò awu, muunya ne bufuku, ku mpekaatu ne mpekaatu yònsò. Nenku tudi balamiibwemù mu dikubiibwa dyònsò. Balamiibwemù munyi? Kùdì Nyuma Mwimpè, babwejiibwe mu Mubidi wà Mukalenge Yesu, ne bakùbiibwe. “Ewu udi

umvwa Méyì Àànyì, ne wìtabuuja Ewu udi muNtume, ùdi ne Mwoyi wà kashidi ne kààkupìcilakù ku cilumbulwidi to, kadi yêyè ùkaadi muumuke ku lufu muye ku Mwoyi.” Kakùcyèna kabidi dilumbulwisha to! Mwena Kilisto kèna ùpìcilakù ku cilumbulwidi to. Kilisto wàkapìcilakù bwèndè yêyè. Mundumbulwidi wanyì wàkiimana pa kaaba kàànyì. Wàkandumbulwila cilumbu cyànyì ne, mèmè mvwa mupangi. Yêyè wàkambila Taatù ne mèmè ncìvwa mukumbanyine to, ne mèmè mvwa mupangi. Kadi Yêyè wàkannanga ne Wàkangata kaaba kàànyì, ne wàkandumbulwila cilumbu cyànyì, ne leelu ewu ndi mudishikamine! Eyowa’s, mukalenge. Ne Yêyè wàkeela Mashi Èndè panshi, bwa kufila mulambu kuntwaku bwa mpekaatu yetu.

⁵⁶ Vùlukààyi diloolo dya mu diisàtù dishààle ne, mwena Kilisto nansha umwe...mwena Kilisto yêyè ngudi wenza mpekaatu, kadi ngènzàmpèkààtu kèna mwa kwenza mpekaatu to. Ngènzàmpèkààtu kàtu yêyè wenza mpekaatu to, bwalu yêyè nngènzàmpèkààtù. Yêyè ùdi ngènzàmpèkààtù anu kwine kwònsò aku, kwàjiki. Tàngilààyi, angàtaayi cya—cya paanyima cya mukanda ewu, ncifiike, ncitùpà cyàcì bùngì kaayi cìdì cifiike? Ncifiike anu cyònsò. Kakwena kaaba katookepu nansha kakese to, ncifiike. Wèwè udi wamba ne: “Too ne *apa* nunku.” To, kí nnanku to, cintu cyònsò mu kaabujimà ncifiike. Cyònsò ncifiike. Mushindu awu ngùdì ngènzàmpèkààtù. Yêyè mmupiishibwe anu kwine kwònsò aku. Ee, wèwè udi wamba ne: “Kadi yêyè mwendè masandi? Kadi yêyè mukwate mukaji kampana ku bukole mulààle nende? Kadi yêyè—kadi yêyè munaye twarta twa mfranga? Kadi yêyè mwasàngàne cingoma?” Abu bwalu kí mbutùtàngile twètù to. Abu bwalu kí mbutùtàngile twètù to, tudi ne mikenji mwab’ewu bwa kutangila bwalu abu. Twètù katwena balongolodi bàà maalu to, tudi bayiishi bàà Evanjeeliyo. Twètù katwena tumupiisha bwa cidìye mwenze to, katwena tumupiisha bwa dyenda dya masandi to. Tudi tumupiisha bwalu yêyè nngènzàmpèkààtù! Bu yêyè mwena Kilisto, kàvwa mufwànyine kucyenza to. Bwa aci kaayi’s ncyà bushuwa. Yêyè mushintuluke, kààkwenza aci to. Kadi bwalu yêyè nngènzàmpèkààtù, kí cidì cimwenzejà cyòcì aci.

⁵⁷ Mwaba awu’s kí ùdìcì cibyànkulà panshi bipàndà biine—biine bya beena ne anu mikenji. Eyowa’s, mukalenge. Mwaneetu, lekela nkwambile: “Kí nku byenzedi to, kadi nku ngàsà kutùdì basùngìdìibwe, ne ciine aci ku diitabuuja.” Eyowa’s, mukalenge. Mpindyewu, mèmè ncyakupiisha bàna beetu beena ne anu mikenji abu to, bòbò’s mbàna beetu. Ne bòbò nebùikalè mwamwa anu mwikalà bakwabo bwònsò mwa kwikalàmù amu, bwalu Nzambi ngudi mudyànjàle kulongolola bwa Ekeleeziya Wendè kwikalayèmu. Kadi bwalu bùdì anu ne, nwènù—nwènù mbàdì bàlamà bantu bapandùlùke mu mushindu wà ne, kabeena bàmanyà ne bwalu bùdì cinyì to. “Leelu ewu, ee, pàmwàpa bu

mémè—mémè mwa . . .” Bàlekèlè wèwè anu bàmanyè; bu mùdibi anu ne bôbò bàdi ne nzala ya maalu a pa buloba, kabèenamù to twamb’eku twamb’eku.

⁵⁸ Ncyèna ne nsòmbelu wa lulamatu kùdi mukàjàànyì ne bwalu ndi ngeela meeji ne mmufwànyine kushipa naanyi dibaka to. Ndi ne nsòmbelu wa lulamatu kùdi mukàjàànyì bwalu ndi mumunange. Awu nngiikàdilù wa ùlonda mikenji utùdi bangàte, wa ne twikalè banangangane ewu ne ewu. Dyambedi, kumpala kwa cyôci kafikakù, kùvwa ne cya kwikala dinanga. Mémè ndi mumunange. Nansha mémè ngiitabuuja ne, bu mémè mwa kwenza bwalu bubi, yèyè mmufwànyine kumfwila luse, nansha nanku ncyèna anu mufwànyine kucyenza to nansha bya munyi. Ndi mumunange.

⁵⁹ Mushindu awu ngùdibi ne Kilisto. Bu mémè—bu mémè mwa kwikala ne mwoyi. . . Ndi ne bidimu makumi ataanu, bu mémè mwa kushààla ne mwoyi too ne ku bidimu makumi citeema anyi lukama, kupetakù bikwabo bidimu makumi ataanu bwa kuyiisha, kadi nciyikù nyiisha musangu nansha wumwe to, nya nkasòmba ku mwelelu wà musulu, nansha naku nkàadi anu musungidiibwe. Nzambi mmunsungile ku ngàsà Wendè, nciyi mumukumbanyine bwa cintu nansha cimwe cìmvwàku mémè mufwànyine kwenza, cínkaadìku mwenze, anyi cintu cikwabo cyònsò to. Ndi nyiisha bwalu ndi muMunange ne munange cisàmbà Cyèndè. Ne ki bwa cinyi ndi mumanye ne ndi muumuke ku lufu muye ku Mwoyi, mbwalu ndi mubanange ne ndi ngenda nkèbangana naabo. Nansha bôbò bàsanganyibwa mu nngiikàdilù wa mushindu kaayi, ndi anu ngenda nkèbangana naabo nansha bya munyi. Ndi nya kabangata nansha bya munyi, mbàkòka nansha bya munyi. Bu bambi ne bakwabo mwa kubengangana naanyi ku méyi, ne mangumba mwa kubengangana naanyi ku méyi, aci kaciyena cingiimanyikaku to. Kùdi cintu kampanda! KacyakaMwimanyikaku Yèyè to! Yèyè wàkalwa buludi munkaci mwa bupidya, ne kabwakaMwimanyikaku to, Yèyè wàkatungunuka anu buludi nansha bya munyi. Ki citùdi twètù twenza ncyôci aci, tuya kabakeba, tubàbàkula nansha bya munyi. Nansha bôbò biikàle cinyi, olola cyanza, ùbàkwàtè, ùshaalè mubakwate ne bukole bwebe bwònsò. Kwèna mumanye ne mbanganyi to. Bàsùngilè. Aci mbwà dinanga. Kabiya ne mbwalu “ndi mwenzejiibwe bwa kuçyenza” to, kadi mbwalu ndi munange, mbwalu wèwè udi munange.

⁶⁰ Wèwè udi wamba ne: “Bìvwa bikèngela bwa mémè kuya kadilongolola ne mukaji awu, kadi, ndi nkwambila mpindyewu mene ne, ngeela meeji ne bu mùndi nya mu ekeleeziya bìvwa bikèngela mémè kuya kalongolola bwalu abu.” To, wèwè nguvwa ukèngela kwanji kudilongolola, dyambedi. Nwamonu anyi? Nwamonu anyi? Wèwè kùyi ne dinanga dya Nzambi mu mwoyi wèbè to, cintu kampanda anyi kansanga’s cidi cikwambila ne udi

mupiile, dîbà adi nda—dîbà adi nda ùkacilongòlòlè ne Nzambi. Pashiishe ùye kacilongolola ne mwena mutumba neebe.

⁶¹ Yesu wàkalongesha cintu cyôci cimwecimwe aci. Wàkamba ne: “Wèwè ulwa ku cyoshelu, ne kwòkù kwikàle. . . wèwè muvuluke ne kùdi bwalu kampanda bùdì mwenzele mwena mutumba neebe anyì mwaneenu awu, anjì nda ùkacilongòlòlè nende dyambedi.”

⁶² Mpindyewu, mpindyewu mu bikondo bicìvwavwà. Twamonu mu diisâtù diloolo, “mamweneshiibwa.” Tudi tucyangata cyakabidi mu dinda emu, mu “mamweneshiibwa a bânà bàà Nzambi.” Mu ngaakwilù mukwabo ne, Nzambi mmwindile. Ne pashiishe ku cikondo cya nshiikidilu patwikalà bônso biimane kumpala Kwèndè. Banjelo bôbò kabàvwa bajimìne to. Bôbò kabaakumanya mwa kusankila mabenasha bu twètù to, bôbò kabàtukù bajimìne to. Kadi mêmè ndi mumanye ne ndi mufumine ku cinyì, ndi mumanye ku lubwebwe kùdìbo bangaapùle, ngènzàmpèkààtù. Wèwè udi mumanye kùdìbo bakwapule. Mpindyewu patùdì bapetêke apa, dîbà adi tudi mwa kwimana kumpala kwa Nzambi. Kaa, ndituku kaayi dîikalàci’s wè!

⁶³ Pashiishe ditèèkiibwa, dishikikiibwa. Mpindyewu, Nzambi ùdi mu mudimu munkaci mwa kwenza cyôci eci. Nenku mpindyewu bu mêmè anu mwa kunufikishilaku cyôci eci, pashiishe netubangile buludi mpindyewu ku mvensa mwi5, ndi muswe kuCibala.

*Mudyànjile kutulongolola ku ditèèkiibwa dya bânà ku
Yesu Kilisto kùdiye yèyè mwine, bilondèshùle disanka
dîmpè Dyèndè Yèyè mwine dya diswa dyèndè,*

⁶⁴ Ndisanka dya Nzambi bwa kwenza diswa Dyèndè, ditèèkiibwa, dishikikiibwa. Mpindyewu cidìYe munkaci mwa kwenza ncinyì? Ùshikika Ekeleeziya Wendè. Dyambedi, Yèyè mmubiikile Ekeleeziya Wendè, ba-Méthodistes, ba-Presbytériens, ba-Luthériens, ba-Baptistes, ùbàbiikila. Pashiishe Yèyè mmwenze cinyì? Mutume Nyuma Mwîmpè ne mubapeeshe dibatiiza dya Nyuma Mwîmpè.

⁶⁵ Ndi muswe bwa nwènù beena Mpenta nuumushe eci mu myoyi yenu amu. Mpenta kî ndingumba to; mpenta ndilabula. N’Nyuma Mwîmpè. Kî mbulongolodi nansha. Kanwenaku mwa kuvwija Nyuma Mwîmpè bulongolodi to. Yèyè kaakucitwaku nyama ku mikolo to. Mpindyewu nwènù nudi ne bulongolodi bunùdì biinyike dînà adi, kadi Nyuma Mwîmpè ùdi ùpátuka buludi ne ùnùshìya basòmbe mwaba wunùdì nusanganyiibwa awu, ne ùtùngunuka anu ne kuya. Nwamonu anyì? Mpenta kî mbulongolodi nansha; mpenta ndilabula.

⁶⁶ Nenku Nzambi mmupeshe bânà Bèndè Dilediibwa dipyadiya, ku dibatiiza dya Nyuma Mwîmpè. Bàkafika buludi pabwipi naaDi pàakadikezulàbo, kupicila ku ba-Nazaréens, ba-

Pelèrins de la Sainteté. Pashiishe kubwelabo mu dilabula dya mpenta, anyi dibatiiza dya Nyuma Mwimpè, dyalujulula dya mapà. Bààkaya bènda bààkula mu myakulu ne båndamuna myakulu, ne bapèèshìbwe mapà a dyondopa ne bishima, ne bimanyinu ne maalu a kukema byàkabanga kubafila. Mpindyewu mbànà, mbànà bàà Nzambi. Bàdi nanku mu Kilisto bilondèshìle myaba. Mbalwe bânà ku Dilediibwa. Ne Dilediibwa dipyadiya ne dikudimuna dya mucima Dyôdi diine adi ki didi Nyuma Mwimpè.

⁶⁷ Kwèna mene mukudimune mucima to paùdi kùyi mupete Nyuma Mwimpè. Ki cidì Mifundu myambe. Yesu wàkambila Peetèlò, nùkonkàayi muntu kanà yònsò, nùbalàayi Mifundu yenu, yèyè ùvwa mubingishiibwe mu kwitabuuja kwa Mukalenge Yesu, kulwaye muyiidi, mupostolo. Yesu kumupeeshaYe nsapi ya Bukalenge. Ne Yone 17.17, Yèyè kubajidila, kubapeesha bukole, kubatuma, kwipatabo baadémons ne bikwabo, mubàjidile. “Ùbàjidilè, Taatù, ku Bulelela Bwebe. Diyì Dyebe m’Bulelela. Ndi ndijidila Mémè mwine bwàbò bóbò.”

⁶⁸ Ki dimwe dya ku mèyì a matàmbe kwikala a kalolo dínkaadiku mémè ewu muumvwe ndyôdi adi. “Taatù, Ndi ndijidila Mémè mwine bwa bwalu bwabo.” Nudikù bamanye ne Yèyè ùvwa ne bukenji bwa kwikalaku ne dîkù anyi? Yèyè’s ùvwa muntu. Nudikù bamanye bwa cinyì Yèyè ùvwa ne bukenji bwa kwikala ne mukaji anyi? Yèyè’s ùvwa Muntu mulume. Yèyè’s ùvwa ne bukenji ku bintu byònsò ebi, kadi Wàkamba ne: “Taatù, Ndi ndijidila Mémè mwine bwa bwalu bwabo. Ndi ndijidila Mémè mwine.”

⁶⁹ Mvwa nyiikila ne muyiishi mutekete makeelela awu, nênye kayiisha mwèndè mu maloolo adi panshi aa lwà ku cibeeba eku. Ki mémè kumwela lukonko pa bìdi bitàngilà cintu kampanda, kwambaye ne: “Eyowa, Mwaneetu Branham, bààbùngì bàà ku bayiidi bàànyì kabàtu biitabuuja aci to.”

Mémè ne: “Bààbùngì bàà kùdìbo mbeena ne anu mikenji anyi?”

⁷⁰ “Eyowa.” Mwaneetu yèyè kèna wìtabuuja aci to. “Kadi,” mwàmbiye, “bwa bwalu bwabo!” Kaa, mémè bu wa kumwela citupà kunshingu’s. “Bwa bwalu bwabo, wamonu’s, ndi ndijidila mémè mwine bwa bwalu bwabo.”

⁷¹ Kaa, Yesu ùvwa ùlongesha bantu dikumi ne babidi, bwa ku bantu dikumi ne babidi abu kutwadilaYe bàà pa buloba Evanjeeliyo. Ki kwambaYe ne: “Bwa bwalu bwabo Ndi ndijidila Mémè mwine.” Udyènzèku nanku wèwè mwine bwa bwalu bwa beena mutumba beebe, bwa bwalu bwa muntu kampanda mukwabo. “Kukwaci mudimu ne budishikaminyi bwebe bwenzè bu cya kujikangana naaci nansha,” mwàkambà Pòlò, “kadi dijidilè wèwè mwine!” Ikàlà uditwala mu mushindu mwimpè

kùdi beena mutumba, mùdibi bikèngela bwa mwena Kilisto mulelela kuditwalaye. Miyiiki yebe yikalèku mu mushindu wa ne, wèwè mutwilangane ne mwena lukuna webè, ùdìjidilè wèwè mwine bwa bwalu bwèndè, kùyi mumanye ne cyùdi mufwànyine kwenza ncinganyi to.

⁷² Mpindyewu dishikika dya mwànà. Cintu cya kumpala paanyima pàà mwànà wa balume mumane kulwa, ùvwa ùlwa mwànà wa balume, kadi pashiishe tudi tusangana ne diditwala dyèndè ki divwà dimufikisha ku ditèèkiibwa, ní ùvwa ùditwàla bîmpè anyi to.

⁷³ Nnku cidi ncyena—ncyena mpenta . . . Mpindyewu lekelaayi nnuleeje ne Mpenta kí ndingumba nansha. Mbanganyi bàà ku ba-Baptistes mwab'ewu bàvwà ba-Baptistes, bàdi bapetè Nyuma Mwîmpè, tùmonàâyibi byanza byenu. Nwamonu anyi? Mbanganyi bàà ku ba-Méthodistes bàdi mwab'ewu bàdi bapetè Nyuma Mwîmpè, elàâyibi byanza muulu. Mbanganyi bàà ku ba-Nazaréens bàdi mwab'ewu bàdi bapetè Nyuma Mwîmpè? Elàâyibi byanza muulu. Ba-Presbytériens, bàdi bapetè Nyuma Mwîmpè. Nwamonu anyi? Ba-Luthériens. Bàà mu mangumba makwabo, bàvwà kabâyikù banji kwikala beena Mpenta to, biikàle anu beena dingumba dya cyanààna, bàdi bapetè Nyuma Mwîmpè, tùmonàâyibi byanza byenu. Nwamonu anyi? Pa nanku Mpenta kí ndingumba to, ndilabula.

⁷⁴ Mpindyewu, Nzambi mmukubweje mu Mubidi wà Kilisto (Mpindyewu cidi Ye wènza ncinyi?) paanyima pàà wèwè mumane kufila cijaadiki cya wèwè mwine, mudijidile wèwè mwine ku diditwala dyebe dîmpè, mutumikidi kùdi Nyuma Mwîmpè, cidi bàà pa buloba bambe nansha ciikàle cinyi.

⁷⁵ Ndi—ndi ndaaba eci anu bikole bya menemene, nwamonu's, bwalu . . . Ncyèna ncyàmba bwa kwikala ne cyakwidi cikâyàbàle to. Ndi—ndi . . . bu nwènù mwa kuswa kanwikadikù—kanwikadikù—kanwikadikù bulelela nwela meeji awu to, nwamonu's. Kanwediku meeji bulelela ne mèmè ndi—ndi mwena lwonji to. Ncyèna—ncyèna muswe kwikala nanku nansha. Cidi cìntàcishà mèmè mu meeji, ncyà kwangata bantu ne kubayiisha Bulelela bùdi Nzambi mutume ebu, kadi bòbò bàkùdimuka ne bàtùngunuka ne kwenza anu cintu cimwecimwe aci, ne bàmba mùdibo ne Nyuma Mwîmpè. Aci's cidi cyàmba kukushebeya, nwamonu's. Ncilumbu kaayi eci's? Bàdi bààlukila buludi anu ku cintu cimwecimwe aci, anu bu bàna bàà Izaleela, bàvwa bàjinga mfumu bwa yèyè mfumu ewu kubakookeshaye ne kwikalaye ùbènzeja maalu bu beena Amòlà ne beena Amàlèkà ne beena Pelèshètè.

⁷⁶ Nutukù bamanye, nwènù bainàbànzà, ne mbibi bwa kuvwala mipanu anyi? Nutukù bamanye nanku anyi? Nutukù bamanye ne mbibi bwa kukosa bipya bya nsuki yenu anyi? Utukù mumanye ne mbibi, wèwè mukalenge, bwa kutungunuka ne

kunwa mfwanka ne kwenza maalu mùdì wenza amu anyi? Utukù mumanye ne mbibi bwa wèwè kubènga kwikala bayende wa nzubu webè, bwa mukajeebe ùpeta ndambu wa cilunji cya ciiji kadi ùkwela pambelu pàà ciibi, ki wèwè awu ne: “Eyowa, ùbeneshiibwè’s, munanga wanyi, nèngàalukilè anu kwalukila” anyi? Utukù mumanye ne wèwè. . . Mmuniyì mùdì mwa kwikala mukwaci wa mudimu ku Nzubu wa Nzambi paùdì kùyiku nansha mwa kukontonona webè nzubu sungasunga? S’ncya bushuwa menemene. Wèwè mwaneetu wa bakaji, utukù mumanye ne, bayeebe awu kènà anu bayeebe patupu to, kadi mmukookeshi webè anyi? Nzambi ngudi mwambe nanku. Bwalu mulume kî ngwâkaseeswishii bwa to, mukaji ngwâkaseeswishii bwa. Ne nwènù bayiishi nudi baswe kutungunuka ne kuvwija bakaji bampaasata ne bayiishi mu ekeleeziya yenu, peenu bamanye ne Dìyì dya Nzambi didi dicìpìisha.

⁷⁷ Nenutungunuke anu ne kukwata mudimu ne dîna dya “Taatù, Mwâna ne Nyuma Mwîmpè” adi bwa kubatiiza, pàdiku kakùyikù katùpà kàà Mufundu nansha kamwe kàcàyamba mu Bible. Ndi musweku bwa mwepiskopo wa mutàmèdile anyi muntu mukwabo kanà yònsò àndeeje mwaba wùkaadiku nî nganyì nî nganyì mu Bible mubatiijiibwe mu dîna dya “Taatù, Mwâna ne Nyuma Mwîmpè.” Ndi musweku bwa muntu mukwabo kanà yònsò àndeejè nî nganyì nî nganyì ukaadiku mubatiijiibwe mushindu mukwabo kanà wònsò pa kuumusha mu Dîna dya Yesu. Kadi bàà Yone abu kabàvwa. . . babàtijiibwe, bàvwa babàtijiibwe mu kwitabuuja kwa ne Yèyè ùvwa ùlwa, kadi kabàyi bamanye ne Ùvwa nganyì to. Kadi mbenzè anu bàjingulula cyôci aci, byâkakèngela bwa kulwabo kubatiijiibwa cyakabidi mu Dîna dya Yesu Kilisto. Ndi musweku bwa muntu. . . Nkààdikù—nkààdikù mukonkèkonke beena Assemblées de Dieu, bayiishi bakwabo, ba-Baptistes, ba-Presbytériens, ne bakwabo bònsò. Kî mbasweku—kî mbasweku kuciteeya to. Mèmè ndi musweku kumona Mufundu awu.

⁷⁸ Nenukù dîbà adi ngènjì “mukoleshi wa maalu,” huh, dîbà adi ngènjì “mupâle,” mujimije lungenyi, ngènjì “mubuluke,” anu bwalu ndi nteeta kunwambila Bulelela anyi? Mpindyewu, s’ki—s’ki meeji matooke ngôwò awu, bânà beetu. Muntu yèyè mudifile ne kasuki kùdì Nzambi, wèwè’s udi mudifile ne kasuki, ne byònsò, too ne ku muji. Wèwè—wèwè—wèwè—wèwè’s udi—wèwè’s udi mutèkèiibwe ku luseke, s’udi—s’udi cifùkèiibwà cishiilàngàne.

⁷⁹ Babiiikila mbavule, basungula mbakese. Eyowa’s, bantu bààbùngì mbabiiikidiibwe, udi upeta dibiiikila mu mwoyi wèbè ne: “Eyowa, ndi ngiitabuuja ne Nzambi mmunangè. Ndi ngiitabuuja ne Yèyè mmunnangè.”

⁸⁰ Kadi, mwaneetu, aci, wèwè’s newikalè mujimine anu menemene mùdì bakwabo abu, bwalu bóbò nebalwe kuntwaku

dituku adi, bamba mene ne: “Mukalenge, mèmè’s ntu mwipate baadémons mu Dîna Dyebe. S’ntu mwenze bikwabo byônsò mu Dîna Dyebe. S’ntu mwenze masangisha a dyondopa. S’ntu muyiishe Evanjeeliyo. S’ntu mwipate baadémons.”

⁸¹ Kadi Yesu neǎmbè ne: “Umuka apa, Ncìtu nansha mukumanye to, wêwè mwena lubombo ewu. Anu ewu udi wenza diswa dya Taatù Wanyì!” Bantu kabeenaku mwa kumona aci bwa cinyi? Mpindyewu, ndi mumanye ne aci cidi cifyondola. Kadi ncyêna—ncyêna ne meeji a kwenza ne cìtapanganè ku mwoyi to, ncyêna ne meeji a kucyamba mushindu awu to. Kadi, mwaneetu, mèmè—mèmè. . .

⁸² Bwànyì mèmè bìdi bîmwèka ne tukààdi ku—tukààdi ku cikondo cya nshiikidilu, ne Nzambi ùdi munkaci mwa kwenza ditèèkiibwa, ùtèeka bilondèshile myaba mu Ekeleeziya, mu Mubidi wà Kilisto, Bèndè Yèyè. Mpindyewu, kakwàkwikala bantu bapitepite bûngì bààtèèkàYè muntwamu to, aci ndi nnwàmbila anu mpindyewu. Wêwè udi wamba ne: “Kya, ee, s’nekwikalè bûngì bunene menemene!” Kadi Yèyè’s mmwangate kabidi bidimu binunu bisambombo bwa kubapatula. Vùlukààyi ne, dibiiika dya ku lufu dîdi dilwa ne twètù twangaciibwa muulu pamwe naabo. Anu bakese menemene, nwamonu’s. Kenketa bwalu bwa lupandu lwebe, lukasa. Ùditàngilùlè wêwè mwine bwa kumona ne ncinyi cidi kaciyi cyènda bîmpè. Nwamonu anyi? Tangila ùmonè anu—anu ne cidi cibi ncinyi. Ndi mumanye ne aci—aci ncikole, kadi, mwaneetu, m’Bulelela. M’Bulelela bwa Nzambi. Ditèèkiibwa!

⁸³ Bivwa bikèngela bwa twètù kwikala tulàkuka kapyà bikole bwa Nzambi, bivwa bikèngela bwa twètù kwikala ku mudimu muunya ne bufuku. Kabìvwakù bikèngela bwa cintu nansha cimwe kwikalaci ne mushindu wa kutwimanyikaci to, ne bivwa bikèngela bwa twètù kwikala ne kalolo ne twenza disanka bya menemene, ne musangeelu wà menemene ne bafwànàngàne anu menemene ne Kilisto mu nsòmbelu yetu. Aci cidi cìlòmba nsòmbelu wa ku dituku ne ku dituku. Yesu wàkamba ne: “Tàngilààyi cìlòngò cya mbata wa mu mpàta, mùdici cikola, cikwàta mudimu mukole ne ciluka màndà; kadi Ndi nnwambila ne Solòmò mu butumbi bwèndè bwònsò kààkawwàdikiibwakù bu cimwe cya ku byòbì to.” Solòmò ùvwa ne mizàbì yìvwà milengeja ne swà wa butumbi ne myoya ne màndà a ku nshìngi ne bikwabo, kadi aci—aci kacivwakù. . . aci kí ncivwàYe wàmba to. Bwa cìlòngò cya mbata kukolaci, bìdi bikèngela bwa kukwataci mudimu mukole muunya ne bufuku. Cyùdi ukebela bwa kuvwila apa ku ndekeelu kwa mulongu ncinyi? Piiikalàbì ne mwakane ùdi ùsungidiibwa ne lutatu, ngènzàmpèkààtù, mbwena kwamba ne mwena bupidya, ne mupeetudi wa maalu a Nzambi, muntu udi utèeleja Dìyì, ùbènga kwendelaMu? . . . Nebàkashààdilè penyì? Mpindyewu twètù aba citwènzà ki cinyi? Nwamonu anyi? Mpindyewu aci. . .

⁸⁴ Ewu, mpindyewu, ewu ng'ekeleeziya wetù twétù. Tudi pàmwápà munkaci mwetu emu ne beenyi banaayi anyi bataanu. Kadi ewu ng'ekeleeziya, ndi nnulongesha nwênù. Eci ciyaaya pa mikaba ya mèyì. Ndi muswe bwa bantu bàdì bàtèèleja mikaba ya mèyì, bàvulukè ne, eci mbwa ekeleeziya wanyi mèmè. Munkaci mwa bantu bàà pambelu mwàmwa, ntu nditácishakù bwa kwikala ne bukalanga bukùmbàne bwa kubambila cyòcì aci, kushààdilakù mwaba wà mbèngelekela mu mmwenenu yabo ya mikese menemene ya mabèèle mazoboloja ne màyi ayi. Kadi pàkaadìbi bikafika ku dyadija menemene dya Bulelela, tùBwádijaayi.

⁸⁵ Ditèèkiibwa, dishikikiibwa bilondèshìle myaba! Bàdì penyì biine abu? Ndeejàayikù kùdìbo. Nzambi munkaci mwa kubiikidila bàna Bèndè ku luseke ku dimweneshiibwa. Kabyena bikèngela bwa kwambabo dīyì nansha dimwe pa bwalu abu to, nudi numona ne cintu kampanda ncyenzèke. Munkaci mwa kushikika mwan'Ende bilondèshìle mwaba, ùmubweja mu bulongame anu menemene ne bintu bimwebimwe abi. Yèyè—yèyè ùdi mu bukookeshi anu bùngì bumwe, dīyì dyèndè didi menemene anu mùdì dya Mwarkanjelo, dipite ne apu. Mwànà wa balume ùvwa ùtèèkiibwa, bàmutèeka pa kaaba katùmbùke, bàmsòmbesha pàapa, bàshintulula mizàbi yèndè, bàshintulula meekala èndè. Taatù ùvwa wènza mushingà kampanda, wàmba ne: “Ewu mmwanàànyì wa balume, kubangila ku leelu yèyè ùdi nguuvènà. Yèyè mmukookeshi. Ùdi kumutu kwa bumpyanyi bwànyì bwònsò. Byònsò bìndì naabi mbyèndè yèyè.” Ncya bushuwa. Dìbà adi tudi mwa kwalukila ku cintu cimwecimwe aci, Elah, Elah, Elohim, Elohim, nwamonu's, kùdìYe wikalakù nkààyèndè aku. Ne pashiishe kwalukila kupicila ku Yehowah Wàkenza cintu kampanda awu, Yèyè wakapeesha muntu mwaba wà bukookeshi pa buloba. Citùdì munkaci mwa kwindila ncinyì? Dimweneshiibwa. Buloba bùdì munkaci mwa kutwa mikemu. Tùpwekàayi ku cyòcì aci bwa tùcibalè. Eyo.

...mudyànjlile kutulongolola...ku ditèèkiibwa dya bàna ku...yèyè mwine, bilondèshìle disanka dimpè Dyèndè dya diswa dyèndè,

Ku disaamun-...disaamuna dya butumbi bwa ngàsà wèndè...

⁸⁶ Ngàsà Wèndè ncinyì? Kalekale kumpala kwàka, pàvwàYe kàyi Taatù to; ngàsà Wèndè, dinanga Dyèndè, wàkudyènzela Yèyè mwine mwànà, bwa twwamona mwa kudyànjlila kulongolodiibwa ku ditèèkiibwa dya bàna, ku disaamuna dya ngàsà Wèndè. Nwamonu anyi?

...kùdìye mutùvwijè biitàbìibwe kùdì—kùdì (Mupersona) munanga, udi mwikàle Kilisto.

87 Mutùvwijè biitàbiibwe munyi? KùdìYe. Tudi tubwela munda Mwèndè munyi? Ku Nyuma umwe, babàtijiibwe bônso mu Yèyè. Tèèlejàayi.

Munda mwèndè mmutùdi ne bupikudi, mmutùdi ne bupikudi ku mashi èndè (awu), difwidiibwa dya luse ku m-p-e-k-a-a-t-u . . .

88 Mmunyi mùdi mwa kuyiisha didyànjala-kulongolola, dya didyànjala-kutèèka mu mudimu dya Nzambi, ne disòmbesha, pàdiku kakùyi difuta dya cibawu bwa mpekaatu mwaba kampanda? Bwa cinyi nanku? Dituku dyònsò wèwè's udi utupakana, dituku dyònsò wèwè's wenza bubu. Kadi wèwè mulediibwe cyakabidi, mulume anyi mukaji, paùdi anu utupakana, Nzambi ùdi ùmanya ne wèwè udi unyingalala bwa cyòci aci. Wèwè udi mwa kwimana mu bwikadi bwa—bwa Mfumu wa ditunga Roosevelt anyi bwa muntu mukwabo kanà yònsò, kwamba ne: “Ndi mupiile, Nzambi àmfwilèku luse bwa bwalu ebu.” Bwa cinyi? Nenku ki mwaba wùdi difuta dya cibawu cya Mashi . . .

89 Nudi numona “m-p-e-k-a-a-t-u” awu. Ngènzàmpèkààtù yèyè ùdi ngènzàmpèkààtù, yèyè kèna wèza mpekaatu to. Kadi ekeleeziya yèyè ùdi wùnza mpekaatu, wèza bibi, ùpeta meeji mabi, didifwikakajila dibi, wèza bilèma, wènda ùtetuka mùtu mwànà mutekete wèza amu, ùteeta kuyiila mwa kwenda. Yèyè kèna anu mwanji kumanya mwa kwenda bimpè to, bwalu mmwànà mutekete. Kadi tudi ne Cyanza cidi citwòlwela . . . citùkwàta ne citùshimacisha panshi, cyàmba ne: “Ela eci cidya mushindu ewu, mwanàanyi wa balume.” Yèyè kèna ùtwàmbula ùtùtuuta dipi ku tutàku ne bwalu nyawu twenjì cilema nansha, Yèyè kèna ùtùtuuta bya mufwànyine kutùshebeya ne bwalu tudi tuteeta mwa kwenda to. Yèyè mmutunange mutùdi banange beetu bânà amu.

90 Taatù wa cya bushuwa, wa mulelèlà kî mmufwànyinekù kwela mwanèndè mfimbu pàdiye ùteeta mwa kwenda, bu yèyè mwa kudishinda panshi mu malaba nansha. Yèyè ùdi wòlola buludi cyanza cinene cya bukole ne ùmwambula, ùmukwàta ne byanza byònsò bibidi, wàmba ne: “Ki mùyàkwendabo nunku, mwanàanyi wa balume. Endà *nunku*.”

91 Ki mùdi Nzambi wèza ne Ekeleeziya Wèndè! Ùdi wòlola cyanza ùmwangata mu diboko Dyèndè, ùmwambula wàmba ne: “Enda *nunku*, mwanàanyi wa balume. Tangila, kù—kù—kùcyàmbi nanku to, cyàmbè *Nunku*. Mpindyewu, ekeleeziya nansha wàmba cinyi, cidi *cikampanda* cyàmba, cidi *cikansanga* cyàmba nansha ciikàle cinyi, ùcyàmbè wèwè *Nunku*. *Nunku*, eci ki Cyòci! Dìyi Dyànyi dyòdi diCiyiisha, shààla wèwè anu naaCi, enda naaCi. Shààla wèwè anu naaCi. Cidi bakwabo bônso bàmba nansha ciikàle cinyi, shààla wèwè anu naaCi. Enda *Nunku*. Mushindu wùdi ne cya kwela bidya ngwòwù ewu.”

⁹² Mpekaatu yetu; dinanga bwa difuta dya cibawu bwa mpekaatu yetu, bwa cyanààna katùvwakù bafwànyine kwangula mpasu to. Mushindu mwine wutùdì bafwànyine kwela lwongò mu Méyì awu's wè!

. . . bilondèshùle mabanji a ngàsà wendè,

Udiye—udiye mutùvudijìle. . .

⁹³ “Kuvudija” ncinyì? Kaa, ekelekele! KùdìYe *muwudije*, “mishikì yaci minene.”

. . . yéyè mmutùvudijìle twètù lungenyi lwònsò ne ditàlama,

⁹⁴ “Ditàlama, lungenyi lwònsò lùdìYe mutùvudijìle.” Ne “lungenyi” lwònsò, kalùyi lwà pa buloba to. Lungenyi lwa pa buloba ndukutakane kùdìYe, kadi lungenyi lwà Nzambi ndukutakane kùdì bàà pa buloba. Anu mùdì muunya ne bufuku amu, eci kaciyi mwa kupetangana ne cikwabo to. Kadi pàkaadi dībà dībanga kubànda ne muunya wùlwa, bufuku bùdì bùtangalaka eku ne eku. Ne pàdì Bukènkè bwa Evanjeeliyo bùbanga kubwela, bintu bya pa buloba byònsò bìdì bìbanga anu kujimina. Nenku cìdì cyènza cinyì? Yéyè ùdì ùvudija Bukènkè bwa Dìbà pa bânà Bèndè, bèndela mu Nyuma, balombola kùdì Nyuma wa Nzambi, babàvudijìle ngàsà Wendè, ne ditàlama dyònsò ne lungenyi, luumvu, ne meeji a kumanya mwa kwenda. Paùdì umona ne ncibì, dībà adi ikàlà mudimùke bwa cyùdì wenza aci, mushindu wùdì. . . Cyòci cibì, ikàlà mudimùke mene bwa mushindu wùdì mwa kubundulangana naaci. Mudimùke! Ikàlà ne ntema ya menemene, mutwishiiabwe anu menemene ne udi mumanye mwa kubundulangana naaci. Ne lungenyi bu lwà nyoka, kùyi mwa kwenzelangana bibi to bu mùdì nyuunyi wa nkuci. Kì cyàkambà Yesu.

⁹⁵ Kaa, ki bimpokoto mbyòbì abi's, nwènù balunda bàànyì! Twètù's tudi bafwànyine anu kushààlapù ku dituku ne ku dituku. Byòbì kì mbilenga bilayà anyì? Ditàlama, lungenyi, Yéyè mmutùvudijìlebì, mubìcikije! Kàyì ùtùpèèsha ndambu mu nkutu to, kadi mwangate cikasu cinene cya ditùpula naaci kadi kutungunuka anu ne kubikùpa mushindu awu. Mutùvudijìle, lungenyi pamwe ne ditàlama bya ngàsà Wendè! Kaa, ngàsà udi ukemesha, mushindu mwine wùdì dìyì dya kalolo's wè!

Mpindyewu, udiyè mutùvudijìle twètù lungenyi lwònsò. . . ditàlama,

Mutumanyishe twètù bwalu busokoka bwa diswa dyèndè. . .

⁹⁶ Udiyè wàmabila nganyì? Mangumba anyì? Bu nwènù mwa kuswa, bânà beetu, kanwediku meeji ne ndi mpwekesha dingumba dyenu milongo to, to. Ndi nteeta bwa kunwambila ne cìvwa ncintu cibì anu kwine kwònsò aku. Yesu mmwambe ne: “Ndàayi nukayishe Evanjeeliyo,” dya tuya twètù kadi

kenza mangumba. Ki bwa cinyi katwena baMupete to, tudi twètù twenda bilondèshile lungenyi lwà bantu. Bu Calvin mwa kujuuka's wè!

⁹⁷ Mona's, kî nkwanjì kwenza ntanta to mvwa mwimane ku lukita lwà muntu munene kampana, mulongolodi munene. Ki mèmè kudyambidila ne? “Mushindu mwine wùvwàye muntu munene's wè!” S'ki cìvwàye! Ee, cìvwa... Ncyàku-... Ùvwa n'John Wesley. Ki mèmè kudyambidila ne: “Bu John Wesley mwa kujuuka mu lukita elu leelu ewu ne kumona ngiikàdìlù wa ekeleeziya wèndè, yèyè's mmufwànyine kukwacika bundu bwa dîna dyèndè!” John Wesley ùvwa muntu wa difwana dya Nzambi, lukunyi lwa kapya lupatula mwíkù, mùvwàye ùcìbìikila. John Wesley ùvwa muntu wa cijila mwikàle wìtabuuja Nzambi, ne ùvwa wènda ùMulonda ku cidya ne ku cidya. Kadi paanyima pàà John mumane kufwa, kwambabo ne: “Netwènzàayi ekeleeziya bwa John bwa twikalèku ne ekeleeziya, nenku netumwinyike dîna ne ng'ekeleeziya wa ba-Méthodistes bwa mushindu wèndè wà dijidiibwa wùdì mudimu mwibìdì wà ngàsà.”

⁹⁸ Dìbà adi kwenzabo ekeleeziya, kadi leelu ewu biine beena ekeleeziya awu abu bàdi babenga kwitaba byònsò bivwà John Wesley útwa nyama ku mikolo abi. John Wesley ùvwa ùyiisha dyondopa dya kùdì Nzambi. John Wesley ùvwa wìtabuuja dibatiiza dya Nyuma. John Wesley ùvwa wìtabuuja dyalujulula dyònsò dya mapà. John Wesley, Martin Luther, bààbùngì bàà ku bantu banene abu bàvwa bààkula mu myakulu ne bàyàndamuna. Kadi, leelu ewu, wèwè udi mufwànyine kwakula mu myakulu mu ekeleeziya wa ba-Méthodistes anyi mu ekeleeziya wa ba-Luthériens, s'mbafwànyine kukwela pambelu pàà ciibi. Ncilumbu kaayi eci? Anu mu cikondo ciine cìvwà cikèngela bwa twètù kushikika bàna aci, ncilumbu kaayi eci's? Bòbò bàtèeki cintu kampana cya cyanààna, bwalu kî mbamanye bwalu busokoka bwa Nzambi to. Ne kabààdyàkuCimanyinaku to ku seminere to!

⁹⁹ Ngǎnjì nñubadileku anu cintu kampana. Mbìmpè anyi? Eyo. Tùbuululàayi, ndi ne cintu kampana cifùnda kaaba aka. Tùjandulàayi mùvwà Pòlò... Mpindyewu, kaaba aka, ki mulongeshi wa Mukenji ewu nyèyè ewu. Tuyaayi mu Byenzedi 9.5, bwa katanci kakese cyanààna. Tèelejàayi mwàkapetà Pòlò Dibuulula edi, cyònsò mene cyàkenzekà aci. Mpindyewu, mu Byenzedi 9 tudi tubanga kubala, mushindu ewu. Aka nkalaasa kàà Dyalumingu, pa nanku bwa cinyi katùyì—bwa cinyi katùyì mwa kucibala? Nwàngambilaayikù bu mèmè mwa kupatuka mu...?...

Kadi Sharwùlà, mucìkàle wèyela mifuunu... (Kaa, keena Yuda kàà dyùlù dikònyàngàle, kàà cilunji cibànde, ne kàà lwonji aku!)... bwa kushebeyangana ne bayìdì bàà Mukalenge, wàkaya kùdì mwakwidì munene,

*Ne wàkajinga bwa kupetaye kùdiye mikanda mituma
ya ku Damàsèkè ku nsunàngòngà, bwa ne yèyè mupete
nì nganyi. . .*

¹⁰⁰ “Nènye mèmè ngenda nkèbangana naabo! Mèmè ndidingè anu mbàpetè, balumyana wa yààyà, kadi mèmè’s nèmběnzè cyesu!” Wamonu anyi? “Mèmè ndidingè anu mbapete!” Kadi yèyè ùvwa mudyànjila kulongolola’s!

¹⁰¹ Wàmanyi munyi ne musùmbishi wa mu musokoko wa maala a kapywa wa kale kuntweku awu kî mmudyànjila kulongolwela Mwoyi? Wàmanyi munyi ne mukaji wa ndumba mulalakanyi wa mu misèsèsù ùdi wèwè kùyi muswe nansha kwakwisha awu, udi mumanye munyi ní dimulabula dikese dya ku cyanza ne dimubiikila bwa kulwaye mu ekeleeziya kî ndifwànyineku kumuvwija munsantu wa Nzambi, mu Butumbi mwàmwa? Pàdibi ne. . . Wàmanyi munyi ne kèna cyôci aci? Aci nciitudi twètù katùyi bamanye to. Kadi aci kî wètù mudimu. Anu mwàkeelà mulobi bukòndò mu mbù ne kubukokelaye ku mukuna amu, yèyè wàkawkàtamù ndimba, mishipa, misodyà, ntàndà ya mu màyi, ne bikwabo byònsò, kadi bimwe bya ku byòbì abi bivwa mishipa. Yèyè kàvwa mumanye to, wàkeela yèyè anu bukòndò cyanaàna. Kî citùdi twètù twenza ncyôci aci. Tàngilàayi Pòlò.

*. . . ùjinga mikanda mituma ya ku Damàsèkè ku
mansunàngòngà, bwa ne yèyè mupete nì nganyi nì
nganyi mu njila ewu, nansha biikàle balume anyi
bakaji, wàmòna mwa kubaswika ne kulwa naabo
ku Yelusàlèrà. (Mwaneetu, yèyè’s ùvwa mushile wa
biyooyi!)*

*Nenku pàvwàye munkaci mwa lwendu, wàkafika
pabwìpi ne Damàsèkè; kî dyakamwe bukènkè
kumunyungulukilabu. . .*

¹⁰² “Kwàkalwa mwakwidi kampanda mu njila amu, Docteur F. F. Jones, kumwambilaye ne: ‘Bìdi bikukèngela dilabula dya—dya ku seminere mpindyewu, wèwè mwanàanyi wa balume, ne ndi ngeela meeji ne Nzambi mmufwànyine kukwataku neebe mudimu’ anyi?” Aci kî ncifwànyineku kwikala Mufundu wa mmwenekelu wa ùkwàcisha bwòwà anyi, bu twètù mwa kucibala mushindu awu? Mpindyewu, aci’s cidi cyùmvwika bu cya meeji anu. . . Ncyèna ngamba nanku bwa kwela bilele to. Aci’s, twètù, aci’s cidi cyùmvwika cya meeji anu mùdi citùdi tupatulamu leelu ewu eci. “Udi mumanye’s, mamwèbè ùvwa mukaji mwìmpè, mèmè’s ndi ngeela meeji ne wèwè udi mufwànyine kwikala muyiishi mwìmpè.” Tàngilàayi numone cyàkenzekà.

*Nenku pàvwàye—nenku pàvwàye munkaci mwa
lwendu, wàkafika pabwìpi ne Damàsèkè; kî dyakamwe
kuteemaku bukènkè mu nyungulukilu wendè lwà,*

bukênkè... (yoyöyò, nyawu byàbangi bya bitàmbe-mfùkìlu)... bukênkè bufùmine mu dyulu,

Ne yêyè wàkadishinda panshi mu malaba, ne yêyè wàkumvwa ñiyi dyàmba... Shawùlà, Shawùlà, udi ukengesha bwa cinyi?

Ne yêyè wàkamba ne: Wêwè udi nganyì, Mukalenge? Ki Mukalenge wàkamwambila yêyè ne: Ndi Yesu ùdi ukengesha awu, ne bìdì bikole bwa wêwè kukandamana.

Ne yêyè wàkazakala ne yêyè wàkakèma e kwambaye ne: Mukalenge, udi muswe bwa mêmè... kwenza cinyi? Ne Mukalenge wàkamwambila ne: Juuka, bwela mu cimenga, ne nebakwambile cyùdi ne cya kwenza.

103 Nenku bantu abu bààkaya nende mu lwendu alu, ne bààkatungunuka, ne bààkasangana muntu kampanda. Ànaaniyà, kuntwaku, kumonaye cikeena-kumona. Byònsò anu bya bitàmbe-mfùkìlu's! Ki mukwacikwetu Shawùlà awu, mwena lwonji wa kale awu! Ànaaniyà ewu kumonaye cikeena-kumona, kutangilaye mu nzubu mwèndè amu. Yêyè ùvwa muprofeta, mwikàle ùsambila mu nzubu mwèndè, ki kumonaye cikeena-kumona. Yêyè... Mukalenge kwakulaYe nende e kwambaYe ne: “Kùdi kùlwa muntu wènda ùpweka ne njila kuntu kwàka, mwikàle mpofo anu bu mudimà, ne ñinà dyèndè n' Shawùlà, n' Shawùlà wa ku Taashishì.”

104 Awu kwamba ne: “Mukalenge, s'ndi muumvwe bàlonda maalu manene. Kùntùmu mêmè to, mêmè ndi kaamuntu kàà musèmpèsèmpè. Kùntùmukù mêmè kùdiye to.”

105 Yêyè ne: “Kadi, mona, mu njila mùvwàye wènda ùlwa amu, Ndi mumuleeje cikeena-kumona. Ndi mumuwenekele mu Dikunji dya Kapya. Ndi mumuvwiye mpofo anu wetu wa menemene ewu. Nenku bìvwa bikèngela bwa Mêmè kumuvwiya mpofo ne kumusunsula kumpala kwa Mêmè kumuvwijaku cintu kanà cyònsò. Wamonu's, bìvwa bikèngela bwa Mêmè kusunsula teoloji wèndè yònsò awu. Udi mumanye's, yêyè ùvwa—yêyè ùvwa—yêyè ùvwa muntu munene mu umwe wa ku ekeleeziya ya kuntu kwàka yàya. Mmupetè mapolome a mishindu yònsò, kabìvwa bikèngela bwa yêyè kupiluka ní mmu cinyi ní mmu cinyi cyònsò to, kadi,” mwàkambàYe, “cìvwa cikèngelà bwa Mêmè kwenza nkuumusha byònsò abi mu yêyè.”

106 Cintu cìvwa ncyòci aci. Cìvwa ne bwalu kí nkusakidila bikwabo mu yêyè to, kadi kubyumusha mu yêyè. Ngeela meeji ne ki lutatu lùdìku ndwòlò alu ne bààbùngì bàà ku balombodi beetu bàà maekleeziya leelu ewu; kubyumusha mu nwènù, mwaba wùdi Nzambi mwa kuteeka Nyuma Mwimpè munda mwabo. Kuumusha! Tàngilàayi, yêyè kwamba ne ùvwa... .

107 Ki kwambaye ne: “Mukalenge, kadi muntu mwine ewu—ewu—ewu's mmuntu wa ùkwàcisha bwòwà.”

¹⁰⁸ Yèyè ne: “Kadi, mona, yèyè’s nyawu ùsambila. Mpindyewu, wèwè neupwekeleku mu kaamùsèsù kampanda, Nenku neukafike ku mpokolo kampanda. Ùpicilè mpokolo awu lwà ku dyabakaji, kadi ùpwekè. Nekwikalè nzubu mutooke, ùyekù ùkookolè ku ciibi. Yèyè mmudyòlòle anu mu cibweledi amu, ki kwònsò kùdìbo paabo bapete mwa kumufikisha nkwòkù aku. Ùmutentèkèlè byanza, ùye nendè ku musulu wà mu Damàsèkè aku ùmubàtìizè mu Dìna dya Yesu. Bwalu, Ndi nkwabila cìNgèzà, nebikengelè bwa kukèngayè mu bintu byàbùngì Bwànyì Mèmè, bwalu yèyè mmusanjeela Wanyì kùdì bàà Bisàmbà bya bende.” Amen!

¹⁰⁹ “Ee, mpindyewu, anjì indila kakese, Mukalenge! Mpindyewu, bìvwà bikèngela bwa mèmè kumubela bwa kuya kabwelaye mu cilongelu kaayi?” Mèmè nènñwàmbilè citwènzà, tùbalàayi Galàtiyà bwa twètù kujandula. Anu nshapita udi ulonda—udi ulonda paanyima menemene awu. Twàngatàayi Galàtiyà 1, tùbangilàayi ku mvensa wa 10, kadi tùjandulàayi ne Pòlò wákaya ku cilongelu kaayi, ku seminere kaayi, ne byanza byàkamutentekelàbo bìvwà mbya nganyì, ne, kaa, byònsò biine byàkenzekà abi. Galàtiyà nshapita wa kumpala. Bwa kulaminyinaku dìbà, tùbangilàayi lwà ku dikudimuna dyèndè dya mucima, ku mvensa wa 10 aku.

Bwalu mpindyewu ndi nswishisha bantu anyi, anyi Nzambi? anyi ndi nkèba bwa kusànkisha bantu anyi? Bwalu pùkalàbi ne mèmè ncidi nkèba bwa kusànkisha bantu, ncyèna musadidi wa Kilisto to.

¹¹⁰ Kaa, ekelekele, ekelekele, ekelekele! Swàyi ngàmbèku anu kaacintu kakese cyanàànà kumpala kwa cìdì apa eci. Galàtiyà 1, angataayi nshapita wa 8. Mbanganyì bàdiku bamanye ne Pòlò ngwàkenzeja bantu abu bwa kubatiijiwbabo cyakabidi mu Dìna dya Yesu, Byenzedi 19? Ncyà bushuwa ne ùvwa nyèyè. Twànjì twàngatàayi anu ndambu mukese cyanàànà kumutu eku, mvensa wa 8—wa 8.

...nansha twètù, anyi mwanjelo mufume mu dyulu, munuyiishe evanjeeliyo mukwabo nansha ne ngwa bishi mushiùlàngàne ne utùdì twètù banuyiishe ewu, ediibwe mulawu.

¹¹¹ Mwine Evanjeeliyo ewu udi mumupetele penyì, Pòlò? Mvensa wa 9.

...mutùkaadi bambe kumpala amu, nyewu ngamba cyakabidi mpindyewu ne: Muntu nansha bàmwamba ne nganyì yèyè munuyiishe nwènù evanjeeliyo mukwabo nansha ne ngwa bishi mushiùlàngàne ne unùdì bumvwe, baakidile, ediibwe mulawu.

¹¹² Ìkalè mwarkanjelo, ìkalè mwepiskopo, ìkalè mukulu-mutangidi, ìkalè Docteur *Kampanda*, nansha yèyè nganyì, yèyè kàyi ùyiisha dibatiiza dya mu màyi mu Dìna dya Yesu Kilisto,

dibatiiza dya Nyuma Mwîmpè, kàyi ùyiisha dyalujulula dya mapà, Dilwa dya Kilisto, bintu byònsò ebi, ediibwe mulawu! Yèyè ùteeta bwa kwangata katùpà kampanda kàà Dîyi edi kaaba aka bwa kwamba ne kàvwa kàà dituku dikwabo ne ùkàtèekela pa mmwènenu mupyamùpyà kampanda wa mukùtākàna utùdi bayiilè mu seminrere kampanda, mulawu wùmulandàlè!

113 Tùtungunukàayi ne kubala, tumone mùvwà Pòlò mucipete, tumone ne mmushindu kaayi, cìndi nteeta kunwambila mu dinda emu eci.

Bwalu mpindyewu ndi nswishisha bantu anyi, anyi Nzambi? anyi ndi nkèba bwa kusànkisha bantu anyi? Bwalu pùikalàbi ne mèmè ncìcivwa anu nsànkisha bantu, dîbà adi ncyèna musadidi wa Kilisto to.

114 Mmunyi mùndiku mwa kutekemena cingà cintu, mmunyi mùdiku muntu udi munange Nzambi, nangananga, muyiishi, mwa kutèkemena cingà cintu pa kuumusha kwikala mukinyiibwe kùdi bantu? Bantu's nebàkukine. Ee, bòbò bàakamba. . . Yesu wàkamba ne: "Pùikalàbo bàMbiikila Mèmè, Mfumu wa nzubu. . . Mèmè's ndi Mfumu, munene munùtàmbe nwènù bònsò. Mèmè's ki Udi mwa kwenza bishima bitàmbe bùngi ne kubyenza kabidi byàbùngi ku Nyuma Mwîmpè kunùtàmbe nwènù bònsò, bwalu Mèmè ngudi ne kaabujimà kòswàkònsò munda Mwànyi. Kadi pùikalàbo bàMbiikila 'Belèzèbulà,' mmunyi mwabengabo kunubiikilaci nwènù? Kadi," mwàkambàYe, "kanùdyèlèdi meeji bwa cinwikalà mwa kwamba nansha, bwalu bàakulà kî nwnènù to, necìikalè Taatù udi musòmbèle munda mwenu, ki wàkula dîbà adi. Nwènù shàalaayi anu ne Dîyi." Nenku Yèyè, pàakajikijàYe kufunda Mukanda awu, Wàkamba ne: "Muntu yònsò wùmushila Dîyi dimwe ku Mukanda ewu anyi wasàkidilaKù dîyi dimwe awu, cyòci cimwecimwe aci necyumushiibwe ku Mukanda wà Mwoyi, bwèndè yèyè." Nzambi àtùkwàcishèku bwa twashàala anu naaDi!

115 Mpindyewu mvensa udi ulonda, ngànji mbale mpindyewu, mbale lukasalukasa mpindyewu.

Kadi ndi njaadika. . . (Mbwenà kwamba ne, nényè neenu too ne ku cilumbulwidi.) Ndi nnùjaadikila, bàna beetu, ne evanjeeliyo wàkayishibwa kùndi kî ngwa kùdi muntu nansha.

"Mpindyewu, ncyèna nî m'Méthodiste, nî m'Baptiste, nî m'Presbytérien, anyi nî mmwena Mpenta nansha; kàvwà wa kùdi muntu to. Anyi nî. . ."

Bwalu ncyàkamupetela nî nkùdi muntu, anyi kabàakamundongesha to, . . .

116 "Mèmè ncìtukù mumupetele kùdi bantu, ku seminere kampanda nansha umwe, kùdi docteur nansha umwe, ku

bunzambi nansha bumwe, ku cilongelu cya bulongeshanganyi nansha cimwe to. Ncìtukù mumupetele mu mushindu awu to, ncìtukù mumulongeshe mu awu mushindu to, ncìtukù mumusangane mu awu mushindu to, kàakalwakù kùndi mu awu mushindu to.” Kadi wàkalwa mushindu kaayi’s, Pòlò?

...kabààkamundongesha to, kadi nku dibuulula dya kùdi Yesu Kilisto.

117 “PàakaDibuululà Kilisto kùndi ne, Yèyè ùvwa Mwànà wa Nzambi, pàakapònà Dikunji dya Kapya adi pambidi pàànyì dituku adi, mèmè kwamba ne: ‘Wèwè udi Nganyì, Mukalenge?’ Yèyè kwamba ne: ‘Ndi Yesu.’”

118 Mpindyewu, nènnùleejè cyà—cyàkamwenzekelà aci. Mpindyewu, mpindyewu mene bu muntu mwa kwenza dilabula, bôbô’s mbafwànyine kujinga kumupeesha bidimu dikumi bya kulongaye cyena Ngelikà, ne bidimu dikumi bikwabo bya kulongaye cintu kampanda cikwabo, ne pa dyôdi dîbà adi bwèndè bütùuka’s. Tàngilàayi.

...ncyàkamupetela nî nkùdi muntu, anyì kabààkamundongesha to, kadi nku dibuulula dya kùdi Yesu Kilisto.

Bwalu nukàadi bumvuumvwe miyiiki yànyì ya mu bikondo bishààle mu ntendeleelu wa beena Yuda, . . .

119 “Mèmè mvwa docteur munene’s, balumyana wa yààyà. Mvwa naabi.” Yèyè ùvwa mulongeshiibwe ku makàsà a Gàmaalièlè, mulongeshi uvwa mutàmbe kutumbuka utwabò nende mu ditunga. Mbanganyi bàdi bamanye ne Gàmaalièlè ùvwa umwe wa ku balongeshi banene, bàà batàmbe bunene? Eyowa’s, mukalenge. “Ntendeleelu wanyì wa beena Yuda, balumyana wa yààyà, mvwa mumumanye ku mwoyi; mvwa mumanye byònsò ne mwa kwamba ku mwoyi Diitaba dya Bapostolo ne bintu byònsò abi, nudi numonu’s. Mvwa mumanye mwa kwamba masambila ònsò a mu dinda awu ne mwa kubenesha bantu.” Nwamonu anyi?

...mùngààkakèngeshà musangu awu ekeleeziya wa Nzambi bipite ne cipimu, ne kumunyangá:

“Mùngààkateetà bwa kwimanyika musùmbà wà bansantu babunguluki bàà mu malaba awu!” Nwamonu anyi? Nwamonu anyi?

Nenku mèmè mvwa ne mushinga kùdi ntendeleelu wa beena Yuda. . .

120 “Mvwa muntu munene. Balumyana, s’ncya bushuwa ne mèmè. . .mvwa ne mushinga’s, mèmè kubaleeja ne mvwa mwa kubavingila panshi, bwalu ngàkashebeya Stefano ne bikwabo bintu búngì cyanààna bìndi mwenze. Monaayi mùndi mwenze!” Mushindu mwine wàkabàkèngeshàye bipite ne cipimu’s wè!

Mêmè mvwa ne mushinga kùdi ntendeleelu wa beena Yuda kutàmba ne bààbùngi bàà ku beena mulongo naanyi mu ditunga dyanyi sungasunga, mwikàle ne lukunukunu lupite cipimu bwa bilele bya bankambwa bààbò.

¹²¹ Mpindyewu, vùlukàayi ne, kaciyi Dîyi dya Nzambi to, “bilele bya bankambwa,” bilele bya ekeleeziya, mu ngaakwilù mukwabo. “Ngeela meeji ne mvwa Méthodiste wa mu umwe, mvwa Baptiste wa mu umwe, mvwa mwena Mpenta wa mu umwe.” Kaa, wambilamu anyi? Mêmè ndi muswe kwikala Nzambi wa mu umwe. Eyowa’s, ki cyôci. Nwamonu anyi? Eyo.

. . . bilele bya bankambwa bàanyi.

Kadi pààkasànkishàbi Nzambi . . . (kaa, kaa, Pòlò, s’ki wèwè wâfiki awu) . . . wâkantâpulula kacya anu mu difu dya maamù wanyi, wâkamfikisha mene pa buloba ebu, ne kumbiikilaye ku ngâsà wendè,

Bwa kubuulwila Mwanende munda mwanyi, . . .

¹²² Ciine aci cidi bishi? “Nyuma Mwîmpè munda mwanyi! Byàkasànkisha Nzambi bwa kungangata, Yèyè wâkantâpulula kacya anu mu difu, ne kumpeesha Mwânà, cidì Nyuma Mwîmpè mu mmwenekelu wa Nyuma, munda mwanyi, bwa kuDibuulwilaYe munda mwanyi.” Kaa, ekelekele! Yoyôyò! Ndi—ndi—ndi ngeela meeji ne ndi muswe kwelaku anu mbila ndambu’s.

¹²³ Tangila, lekà nkwambile, wèwè mwaneetu. Pààkasànkishàbi Nzambi! Kaa, aleluuya’s wè! Pààkasànkishàbi Nzambi! Taatù kampanda mukwaciki wa maala. Maamù kampanda . . . Nzambi akubeneshe’s, maman, ncyèna ngamba cintu cibi bwebe wèwè to. Kadi maamù uvwa kâyikù mumanye kantu nansha kamwe pa bidì bitàngilâ Nzambi to anu mùdì kâlulù kakâyi kamanye pa bidì bitàngilâ bilatu bya kwendela naabi mu nêjè. Ne taatù uvwa ulââlâlalaala mu misèsù mukwacike maala. Ne ncîyikù nansha ne bisabaata bya kuya naabi mu kalaasa to, ne nsuki mile mitwe too ne mu nshingu, ne bantu bônso bânkina ne bwalu mvwa mwena Kentucky muneemu mu Indiana. Ne mushindu mwine, kaa, mushindu mwine wùvwâci anu cya mmwenekelu wa wëndeshangana ne ku mwoyi’s wè. Kadi byàkasànkisha Nzambi’s! Amen! Byàkasànkisha Nzambi, Yèyè wâkantâpulula kacya anu mu difu dya maamù wanyi awu, bwa Wàmòna mwa kubuulwila Mwan’Ende munda mwanyi, pa kumvwija mwambi wâ Dîyi, uvwa mwa kushâàla anu naaDi buludi, uvwa mwa kuleeja bikeena-kumona ne bimanyinu ne maalu a kukema ne bishima. Nenku, kaa, ekelekele!

¹²⁴ Nwamonu civwâYe wâmba aci anyi? Byàkasànkisha Nzambi bwa kwenza nanku! Munyi? Tèelejàayaaku ne ntema. “Bwa kubuulwil- . . .” Angataayi mpindyewu mvensa wa 16.

Bwa kubuulwila Mwanèndè munda mwànyì, bwa mèmè kumuyiisha munkaci mwa bampangaanu; dyakamwe ncìyikù nkakonka ekeleeziya to.

125 “Ncyàkayakù kùdì mwepiskopo nansha umwe bwa kumukonka ne bìvwà bìkèngela ngènzè cinyì to. Ncyàkayakù kùdì munyiinyi ne mashi, kùdì malongolodi anyì nî ncinyì cikwabo nansha. Ncìvwakù naabo bwalu to. Ncyàkayakù kùdì munyiinyi ne mashi nansha. Anyì ncyàkayakù ku Yelusàlèrà kùdì baakwidi banene bònsò ne baataatù bàà bunsantu, ne bònsò abu to, bwa kwamba ne: ‘Mpindyewu, nudi bamanye’s, ndi mumone cikeena-kumona, cìndi ne cya kwenza ncinyi pa bwalu abu? Ndi mumone Mukalenge Yesu mubeneshiibwe awu mu cikeena-kumona.’ S’bàvwà bafwànyìne kwamba ne: ‘Kàtukà mwab’ewu, kaawèwè! Ncinyi cidì. . .Kaawèwè kansantu kabunguluki kàà mu malaba aka! Ee, cidì cikwenzèkèle ncinyi?’ To, mèmè’s mvwa ne mapolome abo ônsò awu anu kwine kwònsò aku. Mvwa ne. . .”

126 Nenku Pòlò mmwambe kaaba aka, mèmè ndi mwa kunuleeja mu Mifundu ne, yèyè mmwambe ne byàkakèngela kupwaye mwoyi byònsò bìvwàye mulonge abi, ne kubibala bu bintu cyaànà, bwa kumanayaye Kilisto. Kaa!

Anyì ncyàkabàndakù ku Yelusàlèrà kùdì aba bàkaavwà bapostolo kumpala kwànyì abu to, kadi ngàkaya ku Arabie, ne nàkakùdimuka cyakabidi e kuya ku Damàsèkè.

Ne paanyima pàà bidimu bisatu ngàkabànda ku Yelusàlèrà bwa kumonangana ne Peetèlò, ne mèmè kushààla pamwe nende matuku dikumi ne ataanu.

127 Ne patùdì tutungunuka ne kubala, tudi tusangana ne kacya yèyè ne mupostolo Peetèlò kabàvwakù banjì kumonangana to kacya bààbàlela, kacya kabàyi bamanyàngànekù, kacya kabàyikù banjì kumonangana to, kadi pààkatwìlanganàbo bàvwà bàyiisha Evanjeeliyo anu umwèumwè awu. Nzambi’s ùtu ne kalaasa. Nwamonu anyi? Eyowa’s!

128 Ki Peetèlò nyèyè ewu, mwimane mu Dituku dya Mpenta adi, kwambaye ne: “Nyingalalaayi, muntu ne muntu wa kunùdì, nubatiijibwe mu Dìná dya Yesu Kilisto, bwa dilekelediibwa dya mpekaatu yenu, nenupete kupà kwa Nyuma Mwîmpè.”

129 Filipò kwambaye ne: “Kaa, mushindu mwine wùdici cya butumbi’s wè! Bìkèngela bwa mèmè ngènzèku pàànyì cintu kampanda. Kwàka ku. . .Mvwa mupete dibiiikila bwa kuya ku Sàmaalèyà kwàka.” Kuyaye kuntwaku ne kuditwaye mu difila dya bujaadiki mu mùsèèsù. Katanci aka anyì, mubeedi kulwaye, kumutentekelaye byanza, kubangaye kutupika wèla bidya. Kwambaye ne: “Butumbi kùdì Nzambi’s wè, s’ki bwalu mbwòbù ebu!” Kuditwaye mu dyenza dya disangisha dinene. Kwambaye ne: “Nwènu bònsò bidi binùkèngela Nyuma Mwîmpè.” Yèyè

ne: “Cidi cikèngelà bwa nwênù kwenza, bidi bikèngela bwa nwênù kubatiijibwa mu Dîna dya Yesu.” Ki yêyè kubangata, muntu ne muntu mwaba’awu, kubabatiizaye bônsò mu Dîna dya Yesu. Kwambaye ne: “Lwâkù, Peetlò, ùbätentèkèlè byanza mpindyewu.” Ki kupetabo Nyuma Mwimpè.

Peetlò, ku nzubu kwa Kòneeliyò kwàka, cintu cimwecimwe aci.

¹³⁰ Kacya Pòlò kàvwakù mwanji kumumona anyi muumvwe kantu nansha kamwe pa bwalu bwèndè to. Kadi kupicilaye ku nseke mitumbuke ya ku Efèsò, ne kusanganaye bayiidi kampanda. Kusanganaye muyiishi kampanda wa ba-Baptistes, ùvwa, Apòlò, mulumbulwidyanganyi kampanda uvwabo bakùdimwishe mucima, wa meeji matwe, meeji a njàjàmà, mwikàle wàngata Dipungila Dikulukulu ùjaadika naDi ne Yesu m’Mwânà wa Nzambi. Eyowa’s, mukalenge, yêyè ùvwa muntu wa meeji matwe. Nenku bôbò bàvwa munkaci mwa kwela mbila, bàvwa munkaci mwa disanka. Ki mùdì Bible mwambe. Balààyi nshapita wa 18 ne wa 19 ya Byenzedi nenumone ní kí ncyà bushuwa. Bàvwa munkaci mwa disanka, bàvwa munkaci mwa kuja maja mu Nyuma, ne bànyeemakanangana eku ne eku, nudi bamanye’s. Pòlò kwambaye ne: “Kadi nukààdikù bapete Nyuma Mwimpè kacya nwítabuuja anyi?”

¹³¹ Kadi bwenu nwênù bàna beetu ba-Baptistes bàtù baswe kufinyika bantu cyôci aci pa muminu, ne bàdi bambe ne Ngelikà wa ku cibangidilu mmwambe ne: “Nwâkapeta Nyuma Mwimpè kacya, anyi *panwàkiitabuuja* anyi?” Mémè ndi nzwela kadyombò bwa nuntwadile Ngelikà awu! Mémè ndi ne Ngelikà wa ku cibangidilu awu pândi apa. Ndi kabidi ne cyena Alàmâyikà, ne cyena Ebèlù kabidi. Yônsò wa ku yôyi ayi ùdi wamba ne: “Nukàadi bapete Nyuma Mwimpè *kacya* nwítabuuja anyi?”

¹³² “Ku diitabuuja nkunùdì basùngidiibwe,” adi ndiitabuuja dyenu mu Nzambi. Mashi àdi ànùlama bakezùke ku mpekaatu, bwalu àdi àkwàta mudimu bu mulambu. Mashi kí ngàdi ànùsùngilà to, Mashi àdi ànùlama bakezùke. Nudi basùngidiibwe munyi? “Ku diitabuuja nkunùdì basùngidiibwe,” ne ciine aci ku didyànjiila-kumanya dya Nzambi, ùnùbiikila. Nudi basùngidiibwe, ne Mashi àdi ènza difuta dya cibawu, ànùlama díbà dyônsò bakezùke. Ne díbà adi ku Nyuma umwe nkunùdì babàtiijibwe mu Nyuma Mwimpè, mu bwobumwe bwa beena kwitabuuja, ne babwejiibwe mu bwobumwe bwa Nyuma Mwimpè, bwa nwênù kulombodiibwa kùdì Nyuma, nwenza bimanyinu, maalu a kukema.

¹³³ Bindile, bènda bàlwa, bindile cintu kampanda, netùkafikèku anu mu katanci kakese emu, kí mùndi ntèkemena’s. Mwua mukwambile bwa wèwè kumvulwija pa díbà edi, kí mmwòmò anyi? Mbyenzeke anu ne ntapèku dísù. Anu—anu mwaku wumwe anyi yibidi mikwabo. Anu . . . Mi—mikwabo mikese ndambu.

¹³⁴ Lupandu elu lùdi lùshààla too ne dībà kaayi, too ne dībà kaayi? Ndupandu lwa mushindu kaayi? Ndwà lùùmuka ku ekeleeziya lùya ku ekeleeziya mukwabo anyi? Lùùmuka... Tùbuululàayi mu Ebèlù 9.11, katanci kakese cyanàànà, anu—anu bwa kutangila bwa kumona ne ntoo ne dībà kaayi, anu bwa tusunsa tukese cyanàànà. Buululaayi mu Mukanda wà Ebèlù ne—ne tūjandulàayi ne lupandu elu lùdi lùshààla too ne dībà kaayi. Monaayi ne ndupandu lwa mushindu kaayi. Tùbalàayaaku Ebèlù 9.11 mpindyewu.

Kadi Kilisto mwikàle ùlwa mwakwidi munene wa bintu bimpè bicilwalwà, ku ntenta wa kusambakeena mutàmbe bunene ne mutàmbe kwikala mupwàngàne, udi kàyi mwenza ne byanza to, mbwena kwamba ne . . .
(Mpindyewu ewu mmulongeshi anu yèyè umwèumwè awu, Pòlò, nwamonu's.) . . . *kàyi wa nzubu awu to . . . ewu nzubu;*

Kì nnansha ne mashi a mbuji anyi a bânà bàà ngombe to, kadi ku mashi èndè sungasunga nkùdiye mubwele musangu wumwepele (misangu yìngà? Musangu wumwepele!) mu mwaba wà cijila, mwikàle mutupetele. . . (lupandu bwa lumingu lumwe, lupandu too ne ku ditabuluja dīdī dīlonda anyi? Lwà mushindu kaayi?) . . . *bupikudi bwa cyendeleele bwetu twètu.*

¹³⁵ Mwaku ewu “bwa Cyendeleele” wūdi wūmvwija cinyi? Mu Kilisto, paanyima pàà mēmè mumane kwitabuuja... Muntu nansha umwe kēna mwa kubiikila Yesu ne, “Kilisto,” pādiku kakūyi ku Nyuma Mwimpè to. Ki bwa cinyi kūdi bitūpà bisatu bya bantu: beena bupidya, beena kwitabuuja bàà budīngibudīngi, ne beena kwitabuuja. Kadi aba bàkaadi biitabūje Mwoyi wà Cyendeleele abu, bàkaadi bamane kubwela mu mbàlandà.

¹³⁶ Angataayi ntenta wa kusambakeena wa kale awu, cintu cya kumpala cīvwbò bènza ncinyi? Bàvwa bàbwela mu mbàlandà, muntu wa Bisàmbà bya bendè. Cīvwa cìlondà cīvwa ncīyoshelu cya cyamu cya mitakù, kùvwàbò bàsukwila mulambu ku cyowelu cya cyamu cya ngòlò. Cīvwa cìlondà cīvwa ndishebeya dya mulambu wà mashi, ne dimyamina dya mashi pa cyoshelu. Pashiishe, musangu wumwe ku cidimu, Aalòna, mwela maanyi, kaa, (ne cinyi?) ne mánànanshì a cìlòngò cya Rose wa Shaalòna, ne maanyi a musinga mukole àvwwà ne mánànanshì munda mwàwù, bàvwa bàmupòngolwelawù mu mutu, àvwa àpweka too ne ku nzemba ya mùzàbì wèndè. Tàngilàayi numone mùvwàbì bikèngela bwa muntu ewu kuyaye paanyima pàà bilàmbà bikùdika abi, musangu wumwe ku cidimu, mwambule kumpala kwèndè mashi bwa Nkwasa wa Ngàsà. Ne yèyè wàkayamù ne dikombo dyèndè cidimu kampanda ne kudipwaye mwoyi muntwamu. Pàakayàbò bwa kudyangata, dikaavwa dyele ne ntonga ne dyele bilòngò. Ciine aci nciitupà cya mucì cya

kale cìvwàye mwendènde naaci pàmwápa munda mwa bidimu makumi anaayi mu cipeela, citèèkiibwe mu Mwaba wa Cijila awu! Tàngilàayi, pàvwàbo bàngata mashi a cipungidi awu, mashi, yèyè ùvwa mwela maanyi. Ne yèyè ùvwa ùvwàla bivwalu bivwà ne tungonga tukese twa tùdila munda amu, kamuma kàà grenade ne kangonga. Ne bivwa bikèngela bwa muntu awu kwikalaye wènda mu mushindu wà ne musangu wònsò wùvwàye wàmbula mukolo, ne ùya kumpala mushindu ewu ne wèla dikàsà, tungonga atu tùvwa tùdila “Wa cijila, wa cijila, wa cijila, kùdì Mukalenge. Wa cijila, wa cijila, wa cijila, kùdì Mukalenge.” Kaa, ekelekele!

137 Cìndì mèmè ngamba ncinyi? NùCitàèlèjaayi, nwènu Branham Tabernacle! Nudi bapete dyenu dyèsè. Pàdì anu muntu wèdiibwa maanyi a Nyuma Mwímpè, bwa kutèèkiibwayè mu dikù dya Nzambi, bwa kushikikiibwaye kùdì Taatù bilondèshile mwaba, ne kuteekiibwaye mu mudimu mwab’ewu, mu kèndè kiipàcìlà kàà mu nsòmbelu, anyi citù Nzambi mumubiikidile, lwendu lwèndè lùdi ne cya kwikala “Wa cijila, wa cijila, wa cijila, kùdì Mukalenge. Wa cijila, wa cijila, wa cijila, kùdì Mukalenge.”

“Kaa, wèwè udi ne cya kukudimukila ku *cikampanda* bwa kwikala . . .”

“Wa cijila, wa cijila, wa cijila, kùdì Mukalenge.”

“Kaa, wèwè udi ne cya kwitabuuja byònsò bìdì mukulu mwambe, *bikampanda*.”

138 Kadi: “Wa cijila, wa cijila, wa cijila, kùdì Mukalenge.” Dìyì Dyèndè diikalè kaaba kàà kumpala, Dyòdì diikalè byònsò bìdiku, dipwekè anu mwàmwa, disòmbesha munda mwa mwoyi webe! Lwendu lwebe lùdi ne cya kwikala mu Dìyì. “Wa cijila, wa cijila, wa cijila, kùdì Mukalenge.”

139 “Kaa, bu wèwè anu mwa kulwa kuneeku’s wè! Mèmè nènkwambilè citùdì twenza, netùdivwijè bulongolodi, netukuteeke mu bulongolodi bwetu, newikalè muntu munene.”

140 “Wa cijila, wa cijila, wa cijila, kùdì Mukalenge. Wa cijila, wa cijila, wa cijila, kùdì Mukalenge,” mutungunuke wenda uya anu kumpala, cìdì nì nganyì nì nganyì wàmba kacylene ne cìdici cìshintulula nansha, mufwànyine kuumusha mikaba ya mèyì eyi mu cyalu.

141 “Enza *cikampanda*, enza *cikansanga*, enza *cikankenga*, enza *cikansanga*, enza *cikankenga*.”

142 “Wa cijila, wa cijila, wa cijila, kùdì Mukalenge.” Ebe mèsù wèwè udi muatàngije anu Kalvariyo, ne kakwena cintu nansha cimwe cìikalà mwa kwimanyika to! Lwendu lwine lwa mu webè nsòmbelu, wèwè udi wenda upweka ne Cibeeba cya Mfumu, mwela Maanyi a mushinga mukole a dilaabiibwa, ubwela mu Mwaba mutàmbe-Cijila. Yoyóyò! Amen. Eyo.

143 Pòlò mmwambe ne yéyè kààkapetela Eci kùdì bantu to. Mpindyewu cidìye wàmba ncinyi, patùdì twalukila mu Galàtìyà amu, dìleesònà dyetu adi? “Mumane kutumanyisha bwalu busokoka bwa diswa Dyèndè.” Diswa Dyèndè ncinyi? “Mutumanyishe maalu masokoka a diswa Dyèndè.” Nwènú bàdì bàfùnda abu, mvensa wa 9. Mpindyewu nêngiikalè mwa kulwijakaja ne mwànyì mwònsò bwa kupatula cyôci eci, bwalu dîbà dyàyi.

144 Kaa, Dìyì ne Dìyì dyònsò didi bu mùdì. . . ? . . . Kaa, Dìyì ne Dìyì dyònsò didi cimpokoto. Wèwè's udi anu mwa kuDyangata ne kuDipela anu pambidi apu. Udi mwa kuumbula, mèmè ndi mwa . . . Udi mwa kupatula dyònsò dya ku Mèyì awu muntwamu, kuya naadi mu Genese ne kudipela pambidi, kuya naadi mu Ekèsòdèdè ne kudipela kabidi pambidi, udi mwa kuya naadi mu Lewitiki ne kudipela kabidi pambidi, nenku, pawàmbà kwobeka ku Bwakabuulwibwa, Dìkaadi kantu ne kantu anu Yesu! Amen. Udi mwa kucipela pambidi anu mwònsò mùdì muswe amu, nediiikalè Yesu pawòbekà—pawòbekà mu Bwakabuulwibwa. Bwalu, Yéyè mmwambe ne: “Ndi Ewu Uvwa, Ewu Udi, ne Wálwa Awu. Ndi Muji ne Mùtòlokù wà Davidì, Mutooto wà mu Dinda. Ndi Alpha, Omega.” Ki A ne Z mu maleeta a Ngelikà mbyòbi abi. “Ndi kuumukila ku A too ne ku Z. NDI! Ndi byònsò-mu-byònsò.” Aci's ncyà bushuwa's. “Ndi Ewu uvwa ne mwoyi ne uvwa mufwe, ne udi ne mwoyi bwa kashidi. Ndi ne nsapi ya lufu ne iferno.” Kaa, ekelekele! Cimpokoto cyònsò cyùdì wambula kaaba aka ne ubanga kucipela pambidi aci, necishaale kapelu cilwè anu Yesu.

145 Mpindyewu, anu pashiishe ndambu nenku dîbà adi netwi—netwi—netwimanyike. Eyowa. Citùdì bindile ncinyi, dîbà adi? Cyùdì muvwile mu disangisha emu ncinyi? Kiipàcilà kààci nkàà cinyi? Buloba bùdì munkaci mwa kutwa mikemu bwa cinyi? Bòmbè bwa mushinda mbulebelele kuntu kwàka bwa cinyi, tusunsukila ne tupwishipwishi ntwà cinyi? Nenku, kaa, byònsò abi mbya cinyi?

146 Buululaayi, Loomo 8, bwa katanci kakese cyanàànà. Byòbì abi mbindile cinyi? Byònsò ebi mbindile cinyi? Tudi dîbà kaayi? Loomo, nshapita wa 8, nenku túbangilàayi kubala lwà ku, kaa, ndi mufwànyìne kwamba ne ngwa dikumi ne mwandamuk- . . . Túbangilàayi lwà ku dikumi ne citeem- . . . mvensa wa 19, ne kubala anu—anu kaaba aka mene bwa kucivwija—kucivwija cya kalolo anu menemene. Ncyà bushuwa. Ndi mumanye kunùdì nukafikila. Eyo. Loomo, nshapita wa 8, ngeela meeji ne ndi mubinge bwa mpindyewu. Eyowa's, mukalenge. Nshapita wa 8, nenku túbangilàayi apa lwà ku mvensa wa 18. Túbangilàayi anu ku mvensa wa 14 eku.

Bwalu bònsò bàdì balombòdìibwe kùdì Nyuma wa Nzambi, bóbò bàdì. . . bânà bàà Nzambi. (Ncyà bushuwa.)

Bwalu nwênù kanwena bapete nyuma wa bupika bwa kwikala cyakabidi ne bwôwà to . . .

147 “Kaa, ndi ndikonka ní ndiku mwa kushaala mukwake. Kaaaa, ní ngikalakù anu mwa kushaala kacya ngakwàte mpindyewu’s wè!” Kí mbya wêwè kushaala kacya wàkwàta nansha kakese to! Bwalu kabwèna ku ne mèmè ní ndi mushààle kacya ngaakwata to, mbwà ne Yèyè ní wàkashààla kacya wàkwàta. Mèmè ndi munda Mwèndè Yèyè mpindyewu, nwamonu’s.

148 Ee, wêwè udi wamba ne: “Ee, piikalàbi ne mèmè ndi munda Mwèndè!” Mpindyewu nwênù—nwênù ba-Presbytériens nudi wamba ne: “Aa, twètù’s tutu biitàbùje Aci anu kwine kwònsò.” Kadi nsòmbelu wenù’s ùdi ùjaadika ne kanwèna munda Mwèndè to, panwikalà kanùyi ne nsòmbelu uvwaYè Yèyè nende awu, panwikalà kanùyi nwitabuuja Evanjeeliyo umwèumwè wàkayiishaYè awu.

149 Wêwè udi wamba ne: “Aa,” mùdi Baptiste wamba, “bushuwa, mèmè’s ndi ngiitabuuja dikubiibwa dya Cyendeleele.” Kadi nupatuka apa nukana wà bifwankà ne nyeeemena ku maja, ne bakaji bàkòsa nsuki, bàdilaaba bilaabu kwísù ne bènza maalu bu cinyì apa anyì? Mamuma enu’s ngàdì àjaadika ne kanwena nuCiitabuuja.

Pàndì ngamba ne: “Udi witabuuja dyondopa dya kùdì Nzambi anyì?”

“Kaa, Docteur Jones mmwambe ne bìvwà *nanku*, kadi abi’s bìvwà *nanku* mu matuku a kale àa.”

150 Mpindyewu, mwena lubombo naanyi we! Mbwalu kaayi wêwè? Wêwè mwànà mushimakaja naanyi we. Wêwè’s udi kule kwà dikema ne Evanjeeliyo mu mushindu wà bikwàte ne bya luse. Wêwè’s udi mupàmbula mutùma mu njila wa bitoci pa diyaala dya diteema kapyà. Kwênàku umona apa cìdìYe mwambe anyì? Ne, nyuma yònsò udi ujìkula ne Yesu kí mmulwe mu mubidi mpindyewu mene awu, ngwa nyuma mubi. Bible mmwambe ne Yesu Kilisto ùdi umwèumwè awu makeelela, leelu, too ne kashidi. CyàkambàYe musangu awu aci, ki cìdìYe mpindyewu, ki cìdìYe misangu yònsò mushindu awu. Anjàayi anu kuteeleja.

Bwalu nwênù kanwena bapete nyuma wa bupika bwa kwikala cyakabidi ne bwôwà to, kadi nudi bapete Nyuma wa di- . . . [Disangisha dìdì dyàmba ne: “Ditèèkiibwa.”—Muf.]

151 Mpindyewu, paanyima pàà wêwè mumane kutèèkiibwa, eyo, paanyima pàà wêwè mumane kutèèkiibwa. Udi ushikikiibwa, pashiishe udi umvwa, paanyima pàà mushingà mwenjiibwe ne wêwè mubwejiibwe mu Mubidi mu mushindu mujaalàme. Wêwè udi mwànà wa balume, bushuwa, mwànà wa bakaji, paùdì

ulediibwa cyakabidi udi cyôci aci, ki dilediibwa dyebe ndyôdi adi. Kadi mpindyewu udi mushikikiibwe bilondeshile mwaba.

Twêtù katwena bapete nyuma wa...bwôwà to, kadi tudi bapete Nyuma,—tudi bapete Nyuma wa ditèèkiibwa, ku yêyè nkutùdi twela lubila ne: Abba, Taatù. (Ciikalè cyùmviwija ne, “Nzambi wanyì.” Eyo.)

Nyuma yêyè mwine ùdi ùfla bujaadiki pamwe ne nyuma wetù ne, tudi—tudi bânà bàà Nzambi.

¹⁵² Cidi cicyenza mushindu kaayi? Wêwè udi wamba ne: “Butumbi kùdi Nzambi! Aleluuyah! Kabyena bintàcishakù to, mêmè’s ndi mwânà wa Nzambi,” kadi upàtuka ukenza bintu byùdi wenza abi’s? Nyuma wa Nzambi neénzè byenzedi bya Nzambi.

¹⁵³ Yesu mmwambe ne: “Ewu udi uNgiitabuuja, byenzedi bìNdi ngenza yêyè neàbyénzè pèndè.” Nwamonu anyi? Nwamonu anyi?

¹⁵⁴ Piikalà—piikalà—piikalà—piikalà mwonji wà mvinyo ewu mupàtùke ne mukwàme cisumbù cya tumuma twa mvinyo, kadi mukwabo wùdi wùlondà wùpàtuka wùkwàma cisumbu cya mawoji, s’kùdi cintu cipampàlámùke. Nwamonu anyi? Awu’s ng’ekeleeziya musomeka, s’mmwonji wà mvinyo musomeka, s’mmuntu musomeka. Biikalà muntu ne dingumba kampana, mwikàle wa mu dingumba kampana ne ùdibìikila mwena Kilisto, kadi kàyi ne Nyuma Mwîmpè ne kàyi ne Bukole bwa Nzambi ne bintu byònsò ebi. . .

¹⁵⁵ Mpindyewu, wêwè upàtuka apa ne wenza maalu bu musumba wa bantu bàvwà bakwàcike maala aba, anu bwalu udi mwakule mu myakulu. Mêmè’s nkààdi mumone démons yàkula mu myakulu. Eyowa’s, mukalenge. Nkààdi mubamone bàja maja mu nyuma, ne bèèla mbila ne bàpàtula ne ntutu ku mishiku, ne bikwabo byònsò, ne byònsò abi. Mêmè nkààdi mumone bya nanku awu. Ndi. . . Ncyèna mêmè ngamba bwa abi to. Ndi mêmè ngamba bwa Nyuma wa Nzambi.

Nyuma yêyè mwine ùdi ùfla bujaadiki pamwe ne nyuma wetù ne, tudi. . .bânà bàà Nzambi.

Nenku dîbà adi piikalàbi ne tudi bânà, bapyanyi: bapyanyi bàà Nzambi. . .bapyanyi pamwe ne Kilisto; byôbì nanku. . .bwa twêtù kukenga pamwe nende, bwa twamona kabidi mwa. . .kutumbishiibwa pamwe.

Bwalu mêmè ndi mbala ne makenga. . .

¹⁵⁶ Anji tèèlejàayi anu eci. Kaa, eci cyôci kaciya cilenga’s!

Bwalu mêmè ndi mbala ne makenga a cikondo cya mpindyewu eci kî mmakumbanyine kufwanyikijiibwa ne butumbi bwikalà mwa kubuuludiibwa mu twêtù to. Mu twêtù.

Bwalu dindila dya ne mwoyi wùzùka dya bufuki. . .

157 Cidi cileedila kaaba aka, pàdi kaamwaku kakese—kakese mwaba awu, tuuméyi tukese twa kumpenga kwa dibeji, “bufuki” ki cidi cikumbàne, mu Ngelikà.

...dindila dya bufuki, bufuki mbwindile
dimweneshiibwa *dya bânà bàà Nzambi*.

158 Bintu byònsò mbindile cinyi? Bufuki bujimà mbwindile cinyi? Dimweneshiibwa dya bânà bàà Nzambi. Mbwindile bwa Ekeleeziya àbwelè mu kaaba Kèndè. Mwànà wa Nzambi ùwva nganyi, pàvwà Adàmà, citùpà cyèndè cya bukòokeshi cívwa penyi? Buloba. Yèyè, ùwva ne citùpà cya bukòokeshi pa buloba. Ncya bushuwa anyi? Yèyè kàvwà Elah, Elah, Elohim piine apu to; Úwva Yehowah. Nwamonu anyi? Mbwenà kwamba ne: “Mémè ndi Nzambi, ne Ndi mwenze bakwabo bàdi bashààdile kwinshi Kwànyì. Ne Ndi mubapeeshe mwaba wà bukookeshi. Ne mu citùpà cyabo cya bukòokeshi amu, mwaba wà bukòokeshi bwabo, mbuloba.” Muntu ùwva ne mwaba wà bukòokeshi pa buloba. Ne bufuki bwònsò nkòong mbwindile bwa bânà bàà Nzambi bàmweneshiibwè. Kaa!

Tudi bindile dilwa dya dituku dya disanka dya
bukalenge bwa bidimu cinunu adi,
Pààlwà Mukalenge wetù mubènesha bwa
kubakula Mukaj’Ende-musela udi mwindile;
Kaa, buloba bùdi munkaci mwa kutwa
mikemu, bwèla mbila bwa dituku adi dya
disungidiibwa,
Pààlukilà cyakabidi Musungidi wetù pa
buloba.

159 Ncya bushuwa anyi? Bindile. Nzambi munkaci mwa kuteeta bwa kushikika Ekeleeziya Wèndè pa mwaba Wèndè, bwa kuDimweneshaYe, wàngata ewu udiYè mwa kukwacila mudimu ku yèyè mushindu ewu, wàmba ne: “Ki Nyuma Wanyi udi utuuta nkoka mudilekelele awu. Ki Yèyè awu. Bwa, bwa, bwa Mémè—Mémè kumona mwa kukwata mudimu.” Mona, wàngata mukwabo kaaba aka ùmushikika ne: “Mémè ndi mwa kumushikika.” Ditèèka, dishikika, dimwenesha, ùpàtuka nende apa ne ùmwenzela mushingà, ùmukumbula ne Mwanjelo, ùmwambila cintu kampanda. Mpindyewu, piikalàbi ne mmwambe bulelela’s! Mpindyewu, piikalàbi ne yèyè ùdi ùkwàtakaja anu cintu kampanda cyanààna, kabyàkukùmbanaku to. To, to, abi—abi kabyakukumbanaku to, twètù’s tukààdi bapetèpète bya nanku búngì cyanààna. Kadi cìndi mémè muswe kwamba—kadi cìndi mémè muswe kwamba ndimweneshiibwa dya bânà bàà Nzambi, pàdi Nzambi ùdimwènesha Yèyè mwine ne Úmutùma. Nenku díbà adi yèyè ùdi ùpàtuka, ne cìdiye wàmba cidi Bulelela. Cìdiye wènza cidi Bulelela. Cìdiye wènza, ùdi ùmwènesha Kilisto. Mmunyi mùdi wèwè umulumbulwisha? Ku mushindu wùdiye ùshààla ne Díyi awu, anu ne Díyi. Nwamonu’s, ki mushindu wunùdi numanya

muntu yônsò ngwôwò awu, nku mushindu wùdiye ùshààla ne Dìyì. “Bòbò kabàyi bààkula bilondèshìle Dìyì to, kakwena Mwoyi munda mwabo nansha,” mùdì Bible wàmba. Nwamonu anyi? Nubalekele.

¹⁶⁰ Mpindyewu túbalàayi, pashiishe nebikengelè bwa twètù—bwa twètù kwimanyika, bwalu dîbà dyetu dîdì dyènda dîya. Eyo, mu mvensa wa 10, to, mvensa wa 9’s wè.

Mumane kutumanyisha bwalu busokoka bwa diswa dyèndè, (bwa kutùtèeka) bilondèshìle disanka dîmpè dyèndè divwàye mudipangadikile munda mwèndè yéyè mwine,

¹⁶¹ Wàkadìpàngadikila Yéyè mwine cyôci eci, kumpala kwa difuka dya dyulu ne buloba. Mbanganyì bàdì bàcyùmva? Nwamonu anyi?

Bwa ne mu cipungu . . .

¹⁶² Kaa, ekelekele, ki bukwapo bwalu mbwòbù ebu’s! Huh! Kaa, twànji—twànji—twànji tucipitaayi anu cyanààna, nwamonu’s.

. . . cipungu cya kaabujimà kàà cikondo . . .

¹⁶³ Nutukù nwitabuuja bipungu anyi? Bible ngudi mwambe nanku ne: “Mu cipungu cya kaabujimà kàà cikondo.” Kaabujimà kàà cikondo mbwena kwamba cinyi? Kùvwa cipungu, ee, kùvwa cipungu cya Mikenji ya Mòsà. Kùvwa cipungu cya—cya—cya Yone Mubatiiji. Kùvwa cipungu cya Kilisto. Kùvwa cipungu cya bulongolodi bwa ekeleziya. Kùvwa cipungu cya dipongolola dya Nyuma Mwîmpè. Mpindyewu ncipungu cya ditèèkiibwa, cidì buloba bwindile, bûtwa mikemu. “Kadi pààlwà kaabujimà kàà cikondo, pààlwà cipungu cya kaabujimà kàà cikondo,” kaabujimà kàà cikondo aku ncinyi? Pààbiikà bafwe, pààjikà màsaamà, piikalà . . . pààlekelà buloba bujimà kutwa mikemu. “Kaabujimà kàà cipungu cya cikondo.” Tàngilàayi eci.

Dìbà dya mu cipungu cya kaabujimà kàà bikondo yéyè wàmòna mwa kusanga mu cintu cimwe bintu byònsò mu Kilisto, . . .

¹⁶⁴ Kamwenaku ne disanka anyi? Mmunyi mwikalàYe mwa kucyenza? Kusanga bintu byònsò pamwe mu Nganyi? [Disangisha dîdì dyamba ne: “Kilisto.”—Muf.] Nudi nubwela nu Kilisto munyi? [“Ku Nyuma umwe.”] Ku Nyuma umwe nkutùdì bònsò babàtìjìibwe mu [“Mubidi wumwe”] Mubidi wumwe. Ne mwine Mubidi awu m’Mubidi wà Nganyi? [“Wà Kilisto.”] Mumana kulumbulwisha Yéyè wàkangata dilumbulwisha dyetu. Dìbà adi twètù tudi cinyi? “Pàngààmòna [“Mashi.”] Mashi, Nêmpicilè kumutu kwenu.” Musangu wònsò wùdìYe ùtàngila Mubidi awu, ki Wòwù wùdì musòmbè pààpa wàwa, wùmata mashi. Mèmè ndi mu Wòwù awu munyi? Ku Nyuma Mwîmpè. Yéyè ùdì ùpicila anu kumutu cyanààna. Kaa, ekelekele!

Nenku dîbà dya kaabujimà kàà cipungu cya cikondo,
bwa *yêyè wàmòna mwa kusanga pamwe...bintu*
byònsò mu Kilisto, ne bidi mu dyulu, . . .

165 Mpindyewu paùdì muswe kwakula bwa dînà kampanda, netuditwe anu mu dyakulapu mpindyewu mene bwa katanci. Famiye mujimà mu Dyulu mmwinyika dînà kaayi? [Disangisha didi dyamba ne: “Yesu Kilisto.”—Muf.] Famiye mujimà pa buloba mmwinyika dînà kaayi? [“Yesu Kilisto.”]

166 Kùdi bantu bakaji bàà maalu malenga mwab’ewu, bàà maalu malenga, babanji, inābānzà wa cya bushuwa, bainābānzà. Kùdi Mandamu Branham umwepele, Mandamu William Branham, yêyè awu mmukajàànyì. Yêyè ngutu walukila naanyì pambelu. Nwamonu’s, nwènù bakwabo nutu nwalukila ne baabayenu.

167 Kùdi Ekeleeziya munene umwepele udi ne mwoyi wa Nzambi udi ne mwoyi, Yêyè awu ngudi mwangate Dînà Dyèndè, m’Mûle tente ne Nyuma Wendè. Ncya bushuwa. Ncyèna ngamba ne . . .

168 Ncyèna mpiisha byenzedi bîmpè to, ncyèna mpiisha mpitaadi yabo ne bintu bîmpè bìdìbo bènza abi to. Ndi ngeela meei ne mbilenga bya dikema, ne mabenasha a Nzambi kùdi bapele, kùdi bukwàbantu bàdì bàkènga. Ncyèna mèmè mpiisha bikwabo bintu byònsò bìdìbo bènza ebi to. Bwa abi, bìdì anu bilenga. Ne malongolodi abo manene ne miliyò yabo ya ndola ayi, s’mbipiciibwe ne mèmè mbitàngilakù kutamba ngàndà ya maala a kapyà yìdì mu masangu a njila eyi, dîbà kanà dyònsò. Ncya bushuwa ne ndi mbàtwa mushinga bôbò bu bambi biimàne mu cyambilu.

169 Kadi bwa kudisangisha pamwe kundekeelu kwa cipungu eci kwòkù, nekwikalè mwa kwindila dimwèneshiibwa dya bānā bàà Nzambi, mu cipungu ac- . . . bwa Yêyè wàmòna mwa kusangisha bònsò pamwe, bònsò bàdì babwejiibwe mu Kilisto abu. Kilisto ùdì cinyi? Mbanganyi. . . Tudi tubwela munda Mwèndè munyi? Kolinto wa Kumpala 12: “Ku Nyuma umwe nkutùdì bònsò babàtijiibwe mu Mubidi wumwe,” wùdì Mubidi wà Kilisto, ne bavwijiiibwe baabanyanganyi bàà dipà dyònsò ne cintu cîmpè cyònsò cìdìYe naaci. Ncya bushuwa anyi? “Ne buloba bujimà bùdì bùtwa mikèmu, bwèla mbilà, bwindile dimwèneshiibwa pààdisangishà Kilisto ne Ekeleeziya Wendè.”

Bwa . . .cipungu cya kaabujimà kàà cikondo . . .
kusanga mu cintu cimwe . . .byònsò mu Kilisto, ne bidi
mu dyulu, ne pa buloba; ne munda mwèndè mene; . . .
buloba; munda mwèndè mene;

Mu yêyè . . .tudi bapete bumpyanyi . . .

170 Kaa, Mwaneetu Neville, wamfwàku luse bwa mûndì mwangate dîbà edi. Ndi . . .mwaku awu “bumpyanyi.” Kaa-kaka-kaka-kaka! Kaa, bikèngela anu nanku’s! Kaa-kaa-

kaa-kaa! Ndi mumanye ne Yèyè...M'Mwaneetu cilongo cyànyi. Ncyèna...Ndi ntekemena ne ncyèna mupàle to. Ndi—ndi—ndi anu...Ncyèna ngeela meeji ne ndi mupàle to. Kadi, kaa, ekelekele! Cinganyi? “Bumpyanyi.” Tudi bapete bumpyanyi. Bikèngela bwa muntu ikalè mukushiile cintu kampanda. Nzambi, kumpala kwa difuka dya dyulu ne buloba, wàkakushiila cintu kampanda. Dîna difunda mu Mukanda, bwa pàasheyiibwà Mwànà wa mukooko wèwè wamòna mwa kujinguludiibwa pamwe naaCi. Kaa! Tùlamàayi aci bwa diloolo edi. Twànji tütungunukàayi anu ne kubala ndambu. Ekelekele, ekelekele! Mmunyi mutwikalàku mwa kufika ku mvensa mwi3 diloolo edi, anyi ku nshapita mwi3's? Katwena nansha babale mvensa yinaayi anyi yitaanu mu cyòci eci to. Mpindyewu nansha nanku tukàadi tujikija, nansha nanku, nebikengele anu bwa ncìbalè kadi ncìlekèlè nanku awu.

Mu yèyè kabidi tudi bapete bumpyanyi, biikàle...

¹⁷¹ Cinyi? Mmunyi mutùdi tupeta bumpyanyi ebu? Tudi babupete munyi? Mbwalu tuvwa bende lwendu lujaalàme anyi? Tudi tupete bumpyanyi ebu munyi? Mbwalu tuvwa badyànjila kulongolola. Amen. Yoyöyò! Nwènù bânà beetu ba-Arminiens, ndi mumanye ne aci ncikole cipangè ne mwa kukola. Kiipàcilà kàanyi kî nkàà kunutapa ku mwoyi to, kadi bidi anu bingenza bîmpè be bwa kumanya ne cidi...Wèwè—wèwè—udi naaci, udi naaci, mwaneetu wa balume, eyo. Kwèna anu ucimòna to. Nansha nanku wèwè udi anu naaci's. Nwamonu anyi? Wèwè udi bîmpè, nwamonu's, udi bîmpè. Nwamonu anyi? Kadi, kaa, kadi mbîmpè menemene bwa kwikala mucitangile. Eyowa. Anu mùvwà cìvwà Mwaneetu Neville wàmba bwa mwaba wà bintu bishiilèshiiilàngàna byàbùngì, makeelela awu ne: “Angata cibàndilu wikalè wenda unyunguluka eku ne eku bwa kumona ne byùdi naabi mbinganyi.” Eyowa's, mukalenge. Ki mùdi Eci cifwànàngàne naaci. Nyuma Mwîmpè wa Nzambi ki cyetu cibàndilu bwa kutwambila ne bitùdi naabi mbinganyi. Nwamonu anyi?

¹⁷² Nwamonu's, bumpyanyi. Kaa, ekelekele! “Biikàle...” Bumpyanyi bwa mushindu kaayi?

*...biikàle badyànjila kulongolola bilondèshile
kiipàcilà kàà ewu udi wenza bintu byònsò bilondàngàne
ne mubelu wà diswa dyèndè sungasunga,*

¹⁷³ PàvwàYe...kumpala kwa kwikalaYe Papa, kumpala kwa kwikalaYe Nzambi, kumpala kwa kwikalaYe Musungidi, kumpala kwa kwikalaYe Mwondopi, kumpala kwa byònsò ebi, Yèyè wàkadyànjila kulongolola, kufunda Dîna dya Mwànà wa mukooko mu Mukanda, kutangija mèsù panshi mu didyanjila-kumanya Dyèndè ne kumona dîna dyebe wèwè, kudifunda kabidi mwómù amu. Ncinyi ciine aci? Nanku paanyima pàa ntanta wa cikondo ki twètù kulwa pa buloba, balediibwe kùdi

baleedi beena mpekaatu; twêtù kwendakana pa buloba, nudi bamanye's. Katanci aka, anu mùvwà keena Yuda kàà dyùlù dikònyàngàle aku, Pòlò awu, nudi bamanye's, ne—ne yêyè ùvwà ùkumbaja mudimu wèndè, nenku, katanci aka, Cintu kampanda kwambaCi ne: “Mona, mona, mona, mona, mona!”

Wêwè kwamba ne: “Kaa, Abba, Taatù!”

174 Ki twêtù bàdi bàbangà kulwa aba, nwamonu's. Mudyànjlile kutulongolola ku bumpyanyi bwetu munda Mwèndè, bùvwà budyànjlila kutulongolwela abu. Nwamonu's, tuvwa babupyane kumpala kwa difuka dya dyulu ne buloba. Nwamonu anyi? Kaa! Bwa kiipàcilà Kèndè Yêyè mwine bwa kukumbajaku diswa dîmpè Dyèndè Yêyè mwine, kàvwa menemene kàà ne, kwikala Nzambi ne Musungidi.

*Mu yêyè nwènù peenu nwâkiitabuuja, paanyima pàà
nwènù bamane kuteeleja dîyi dya bulelela; . . .*

175 Nenku Nganyi udi Bulelela? Yesu ngudi Bulelela, Bulelela bwa Evanjeeliyo. Evanjeeliyo kaayi? Kùdi Evanjeeliyo anu umwepele. Galàtiyà 1, mmwambe ne: “Nansha Mwanjelo kampanda muyiishe evanjeeliyo mukwabo nansha wa bishi, ediibwe mulawu.” Ewu ki Evanjeeliyo, Evanjeeliyo wa lupandu lwenu; kàyi mukwabo to, kakwena mukwabo to. “Kakwena—kakwena dîngà dîna dipèèshìibwe mwinshi mwa Dyulu dinùdi ne cya kusungidiibwaku to.” Pa kuumusha mu Dîna kaayi? [Disangisha dîdi dyàmba ne: “Mukalenge Yesu Kilisto.”—Muf.] Kaa, mème wè!

*. . . mu yêyè . . . paanyima pàà nwènù bamane
kwitabuuja, nwènù nwâkatwibwa citampi . . .*

176 Kaa: “Paanyima pàà nwènù bamane kwitabuuja!” Mmuneetù mutùdi anu mwa kumbà kulandalapu lukasalukasa's, mwaneetu? Twánjààyi anu kucishiya bwa diloolo edi's, nudi numona bishi? Kaa, ekelekele! Ncyèna—ncyèna anu mwa kuya kule kupita—kupita apu to. Tùcìshìyaayi bwa diloolo edi. Ncyèna anu mwa kushiya mwaku awu “batwibwe citampi” to, mushindu wunùdi nubwelamu, nwamonu's.

177 Bumpyanyi ku didyànjlila-kulongolola. Mèmè ndi mupyane cintu kampanda. Bumpyanyi kaayi? Bìvwà bikèngela bwa muntu ìkalè munshiile bumpyanyi kampanda. Mona's, wêwè udi wamba ne: “Yesu mmukushiile bumpyanyi.” Mfwilaayikù luse! Yesu kàtukù munshiile mèmè bumpyanyi to, Yesu kàtukù mukushiile wêwè bumpyanyi to; Yêyè wàkalwa anu panshi apa cyanààna ne wàkafuta bwa bumpyanyi bwebe, kukufikisha ku bumpyanyi bwebe. Kadi dîna dyebe dyàkafùndiibwa mu Mukanda wà Mwoyi wà Mwànà wa mukooko kumpala kwa difuka dya dyulu ne buloba. Nzambi wàkakupèèsha bumpyanyi bwebe. Bumpyanyi bwebe bùkaavwakù kumpala aku. Yesu wàkalwa anu . . . Bààbùngì, mushindu wùdìbo bàteeta kucyùmvwija ngwòwò ewu: “Nzambi wàmba ne: ‘Ee, kùdi bantu bààbùngì

bajìmine. Muntu wa kùdibo nansha umwe kààkusùngidiibwa to, pa nanku Nêntumè Yesu pa buloba nenku pàmwàpa Yèyè neikalè mwa. . . muntu kampanda neanyingalale, ne neamanye cîNdi mwenze nenku neasungidiibwe.” Kaa, luse wè! Mèmè ncyênàku mufwànyine kulombola byànyì birò mushindu awu nansha, nansha mùdibi ne mîngà misangu ntu mbilombola mu mushindu mubi. Nwamonu anyì? Ncyêna—ncyêna mufwànyine kubilombola mushindu awu to. Kadi bishi bwa Nzambi?

¹⁷⁸ Nzambi, ku didyànjlila-kumanya Dyèndè, wàkamòna anu menemene ne wâszq kusùngidiibwa nganyì ne wabènga kusùngidiibwa nganyì, Yèyè kutuma Yesu bwa kusungila aba bàkaavwàYe mumane kusungula abu. Pòlò, mvensa yitaanu paanyima pàà cyòci eci, kààkambakù ne, “Yèyè wàkatùsungula munda Mwèndè kumpala mene kwa kwikalaku dyulu ne buloba” anyì? Ki bumpyanyi bwetu mbwòbù abu. Nzambi wàkatùsungula, ne wàkatùma Yesu panshi apa bwa kufutaYe mushinga. Bwa cinyì? Dyela Dyèndè dya Mashì Èndè panshi, bwa kabatubadidiku mpekaatu nansha umwe to. Kî ncintu nansha cimwe cyùdi wèwè wenza to. Kadi pawikalà. . .

¹⁷⁹ “Ewu udi wenza mpekaatu ku bukole paanyima pàà mumane kupeta dimanya dya Bulelela, kakucyena kabidi mulambu to.”

¹⁸⁰ Mpindyewu, nenku ki mwaba ngwòwù awu wuwàjuukà cyakabidi, wamba ne: “Kadi bishi bwa aci, Mwaneetu Branham?”

¹⁸¹ Kadi, vùlukààyi anu ne, “ewu udi mupete *dimanya* dya Bulelela.” Bòbò abu kacya kabààkapetakù Bulelela to, bààkapeta anu diBùmanya cyanààna. Nwamonu anyì? Kabyena mwa kwenzekaku to bwa aba bàkaavwà musangu kampanda bamanè kukenkeshiibwa, bavwijìbwe baabanyanganyì bàà Nyuma Mwîmpè, balabùle bukole bwa Dìyì dîmpè. Mùvwà beena kwitabuujà bàà ku mikàlù abu kuntu kwàka. Bantu bààbùngì mbamfundile mikanda pa bwalu abu.

¹⁸² Beena kwitabuujà bàà ku mikàlù abu bààkaya too ne kuntwaku, Yoshùwà ne Kaalèbà bààkaya buludi dyamwàmwoq. Bwa cinyì? Mpindyewu netwinyike aci ne Nyuma Mwîmpè, buloba abu kuntwaku. Ki bòbò aba paanyima *apa*. Anyì *apa*, twàmbè ne *eci* ki Nyuma Mwîmpè, ne bòbò bàdi paanyima *apa*, nudi numona’s. Kwàka ki kùdi mulayi, udi *kwàka*. “Ee, bu bòbò mwa kutuma batentekedi dikumi, umwe mu cisàmbà cyònsò, mu mushindu wà ne twètù bònsò bisàmbà tudi mwa kumanyaku cidi bumpyanyi bwetu, mwaba wikalà bònsò mwa kushikikiibwa muntwamu, mutwikalà mwa kushikikiibwa.’ Pa nanku, nêntume ndambu wa batentekedi.”

¹⁸³ Bònsò kuyabo muntwamu: “Kaa, ekelekele! Bwàlà. Mbafwànyine kutubiikila ne tudi bansantu babunguluki bàà

mu malaba, kubangila anu apu. Bwàlà, huh-uh, katwenaku bafwànyine kwenza aci to.” Nwamonu anyi?

184 Yoshùwà ne Kaalèbà kwambabo ne: “Mémè nênye kamona ne bùdi bishi.” Ki kulwabo apa ne kukènzakanabò eku ne eku. Ekelekele, kufikabo kuntwaku ne kukosabo cisumbu cinene cya tumuma twabo twa mvinyo tùvwà kuntwaku ne kwalukilabo. Bòbò ne: “Balumyana, buloba abu’s mbulenga, s’mbulenga anu bwa dikema ebu! Mona, anjì angatabi kamwe kàà ku twòtò, s’ntwîmpè twa dikema!”

185 “Kaa, bwa bwîmpè kaayi ntwîmpè’s, kadi, kaa, tàngilàayi bilumyana binene byàbya. . . Kaa, katwenaku mwa kwangula mpasu to. Kwimanyinangana ne mangumba manene ònsò awu, bintu byònsò bya binene abi anyi? Kaa, mbibi be, katwena mwa kwangula mpasu to. Bwàlà, mukalenge! Nansha byòbì ne nganyi mwine awu, katwakwangulaku mpasu to. Bwàlà, mukalenge.” Ki kubangabo kwamba ne: “Kaa, enza twàlukilàayi ku ngeesu ya minyiinyi ya mu Ejiipitu ayi. S’mbipiciibwe ne twètù bashààle kuntwaku’s. Katwenaku mwa kwangula mpasu to, ewu njila mmutàmbe kubùmbakana be. Tudi bamanye ne katwena mwa kwenza *cikampanda*, katwena mwa kwenza *cikansanga* to.”

186 Mukulumpe Kaalèbà kwambaye ne: “Alè puwayi, nwènu bònsò!” Yoshùwà kwambaye ne: “Bwikilaayi mukana, muntu ne muntu wa kunùdi! Lekelaayi mémè ngàmbe bwalu.”

187 “Kaa, bakwetu wanyi, bakwetu wanyi, bakwetu wanyi, katwenaku mwa kwangula mpasu to! Kaa, katwenaku bafwànyine kwangula mpasu to. Ee, byòbì bikèngela bwa mémè kushiya dinaya dyànyì dya twarta, Mwaneetu Branham! Byòbì bikèngela bwa mémè kulekela nsuki yànyì yileepa bu ya muntu mukaji mukulakaji, ncyèna anu mumanye cìndi mufwànyine kwenza to. Byòbì bikèngela bwa mémè kuumusha tuputulu twànyì twa tukese etu, mémè—mémè—mémè, ekelekele, ncyèna anu mwa kukumbana to, udi mumanye’s. Ne byòbì bikèngela bwa mémè kulekela bifwanka byànyì, byòbì bikèngela bwa mémè kwenza aci!” Wèwè citebelu cyenji cya maalu ku bukole naanyì we. Eyowa. “Ncyèna anu mwa kwangula mpasu to.”

188 Yoshùwà kwambaye ne: “Kaa, mbwîmpè. Aleluuyah! Tudi mwa kubwangata.” Civwa ncinyi? Bàvwa bòbò bàtàngila bimenga binene bìvwà biibakila munda mwa bimanu abi. Kadi Yoshùwà ne Kaalèbà bàvwa bòbò bàtàngile mulayi wùvwà Nzambi mufile. Shààla ne Diyì, nansha wèwè mwikàle nganyi. Shààla ne Diyì!

189 Bwalu Peetèlò wàkamba ne: “Nyingalalaayi, muntu ne muntu wa kunùdi, ne nubatiijibwe mu Dìna dya Yesu Kilisto bwa dilekelediibwa dya mpekaatu yenu, bwalu mulayi wùdi kunùdi,” (Buloba bulaya kaayi?) “ne kùdi bânà beenu balela, ne kùdi aba bàdi kule, mu búngì bwònsò bwàbìikilabo kùdi Mukalenge Nzambi wetu abu.”

¹⁹⁰ Eci kacinutapiku ku mwoyi to, nkààdi njikija, bu nwênù mwa kuswa kacinutapikù ku mwoyi to. Nwamonu anyi? Ki nwênù abu ba-Pelèrins de la Sainteté ne ba-Nazaréens, nudi babwelè buludi mu dijidiibwa, balwè buludi apa pa kaaba kàà nwênù bafwànyine mene ne kumona bisumbu bya tumuma twa mvinyo, kadi bakùdimùke baalùkile cyanyima. Nudi bamone cìdì cyenzèke anyi? Ki lutatu ndwòlù alu, kacya kanùtukù nwênù basabùke babwelè mu buloba abu to. Ndeejààyikù Nazaréen nansha umwe anyi Pelèrin de la Sainteté umwepele cyanàànà, anyi nî nganyì wa kùdìbo mu madimi a bwambi leelu ewu, udikù wènza tumpanye tunene twa dyondopa ne bimanyinu ne maalu a kukema byenjìibwe. Ndeejààyi anu umwepele cyanàànà. Nwênù's nwasòmbu pamwe ne Ejiipitu, baalùkile ku ngeesu ya ayè. Nudi nwênù biimànyine ku Kaadèsa-baanèà. Aci's ncyà bushuwa.

¹⁹¹ Tàngilààyi, ne lekelaayi nnupeeshe keenu kaaba, mu Ebèlù nshapita mwi6. “Bwalu kabyena mwa kwenzekaku to bwa aba bàkaavwà musangu kampanda bakenkèshìibwe,” s’nuvwa bamanye cìvwà cikèngediibwà. Panwikalà kanùyi bacimanye to, bwa mpindyewu kaayi nwacimanyì. Nwamonu anyi? “Ne bavwijìibwe baabanyanganyi, ne balabùle mapà a ku Dyulu.”

¹⁹² Balabùle, nwamonu's. Bantu bàya mu ekeleeziya, ne bàsòmba mwaba awu bàmba ne: “Udi mumanye's, bôbò's—bôbò's mbafwànyine kwikala babingè. Bwa aci's—aci's—aci's ncifwànyine kwikala cya bushuwa. Ncifwànyine kwikala anu bu ne kakwena bwalu's, kadi ndi nkwambila, mukwetu wanyì, bìdì bikèngela diitabuujà dyàbùngì bwa kwenza cyòci aci.”

¹⁹³ “Balabùle mapà a ku Dyulu, kadi babalè Mashi a cipungidi bu ‘cintu cya patupu,’ miine àvwà manujidile awu.”

¹⁹⁴ Bu mùdì muyiishi, mamwëndè ùmutùma ku mwaba kampanda. Yèyè wàmba ne: “Ndi ne dibiiikila dya kwikala musadidi wa Mukalenge.”

¹⁹⁵ “Eyo. Cintu cya kumpala cìdì cikèngelà bwa mèmè kwenza nkwikala nsukwilangana bilàmbà pa dibaya, munanga wanyì, nenku nènkutùmè ku cilongelu kampanda.” Cintu cya citàmbe bubì cìkaadiku maamù awu mwenzè's. Ncyà bushuwa. Nebamuumushe byònsò bìdì Nzambi ùteeta kwela munda mwèndè abi. Dìbà adi, tàngilààyi mpindyewu.

¹⁹⁶ “Bwalu twètù twenza mpekaatu ku bukole, twenza mpekaatu ku bukole paanyima pàà twètù bamane kupeta dimanya dya Bulelela, dimanya. Yèyè ùcimòna mu Mifundu ne ùmanya ne Bible ùdì wàmba ne Yèyè ùdì umwèumwè awu makeelela, leelu, too ne kashidi. Ùmòna Cyòci aci ne, ki dimanya dya Bulelela. Kucimona, twètù tucijeebula, ne tubala Mashi a cipungidi bu. . .”

¹⁹⁷ Muntu wàmba ne: “Kaa, eyowa's, mèmè's ndi—ndi mwitabuujè Nzambi.” Eyo, udi mwele cidya cya kumpala.

198 “Bushuwa, mêmè ndi mwitabuuje dijidiibwa.” Eyo, wêwè’s udi usanganyiibwa pa mukàlù, apa mene pabwîpi ne kupeta Nyuma Mwîmpè. Kadi udi utangila dyàmwàmwa kadi wamba ne: “Ncyêna—ncyêna—ncyêna mumanye aci to. Byôbi bikèngela bwa mêmè kwenza maalu bu...Bwâlâ bwànyî. Ncyêna mumanye to. Udi mumanye mùdibo bàbiikila biine bantu abu? Uh-huh, ncyêna mumanye ní ndi mufwànyîne kwenza aci anyî ncyêna mufwanyîne kucyenza. Bwâlâ, ngeela meeji ne nêntungunukè anu ne kushâàla mwena...?...” Nwamonu anyî? Nwamonu anyî?

199 Kadi nudi bamanye cìdì cyènzekà anyî? Yêyè mmwambe ne: “Kabyena mwa kwenzekaku to bwa kubwelabo.” Bôbò bààmanyî kujimija dyabo dituku dya ngàsà ku dyanza dya mpekaatu. Bible ngudi mwambe nanku. Ndi mumanye ne aci ncyûme cyoncyonci, kadi Bible mmwambe ne: “Balabùle mapà a ku Dyulu, ne babalè Mashi a cipungidi àvwà...”

200 Bàdi bàmba ne: “Ndi mwitabuuje dijidiibwa, nsòmbelu mwîmpè, mukezuke, wa cijila.”

201 Cya bushuwa, kadi wêwè, pawámònu dibatiiza dya Nyuma Mwîmpè, ne dibatiiza ne bintu bikwabo byònsò ebi mu Bible, kadi ciwènjî ncinyî? Wêwè’s wâbadi Mashi a cipungidi àvwà makujidile awu, bu “cintu cya patupu.” Ciine cìdì cikufikishe too ne kwòkù aku ncinyî, wêwè mulumyana? Ncinyî...?... Ncinyî cìdì cikulamè ku diikala ngènzàmpèkààtù wa ciipanshi? Ncinyî cìdì cyumùshe mpekaatu mu nsòmbelu webè, ne dinwa dya mfwanka ne dinwa dya maala, ne bakaji ne bikwabo byònsò mu nsòmbelu webè, bìvwà kabîyi bikèngela kwikalabi mwòmù abi? Cìdì cyenze nanku ncinyî? Mashi a cipungidi! Dìbà adi udi ufika pabwîpi pakùmbàne pàà ulabula tumuma twa mvinyo twa mu Buloba bukwabo atu, kadi ufwà Evanjeeliyo bundu, ucìina dingumba dyenu! Nzambi àfwe luse! Eyowa’s, mukalenge. “Mubalè Mashi a cipungidi bu ‘cintu cya patupu,’ ne mumane kudyombola midimu ya ngàsà. Kabyena mwa kwenzekaku to bwa kubwelaye mu Buloba abu.”

202 Cìdì cyenzèke ncinyî? Nwènù mbàndì nkonka abu. Mpindyewu, mêmè ndi mulongeshi wa ne bifwanyikijilu, ne muntu kanà yònsò utu mumanye Bible mmulongeshi wa ne bifwanyikijilu. Muntu nansha umwe wa ku bantu abu wàkabwèlakù mu buloba bulaya abu anyî? Nansha umwe wa kùdibo. Nganyî wàkabwèlamù, nganyî wàkasabuka ne kuyamu? Babidi bààkayà dyambedi abu, bààkaalukilà ne kwamba ne: “Tudi mwa kubukwata, twètù tudi mwa kupeta Nyuma Mwîmpè bwalu Nzambi ngudi mwambe! Peetèlò wàkamba mu Dituku dya Mpenta ne, mêmè ‘munyingàlale ne mubàtìjìibwe mu Dìnà dya Yesu Kilisto,’ ndi ne cya kupeta Nyuma Mwîmpè, mulayi wùdì kùndì. Ndi mêmè muswe bwa kucyenza. Ngwànyî mêmè, mulayi ngwànyî mêmè.” Nwacyúmùvù anyî? “Mpindyewu mulayi

ngwànyì mêmè. Ndi ngùpeta, ngwànyì mêmè. Ngwànyì mêmè cya bushuwa.” Bàvwa anu bòbò abu nkààyaabò.

203 “Kaa,” mùdì wêwè wamba, “kadi, Mwaneetu Branham, ku dibiika dya ku lufu!” Kabaakwikalaku to. “Kaa, kabaakwikalaku?” To, mukalenge. Yesu ngwákamba nanku.

204 Bòbò bààkamba ne: “Kadi Wêwè udi uDivwija munene mùvwà Mòsà, ne Wambì ne Uvwa, Uvwa ‘mumone Abraham.’” Kì awu ne: “Ne—ne—ne—ne Abraham mwine’s ùkaadi mufwe! Mona’s, Wêwè kùyì—Wêwè kùyì ne bidimu bipite pa makumi ataanu to, kadi Ujuuka wamba mŪvwà mumone Abraham?”

205 Yèyè kwamba ne: “Kumpala kwa Abraham kwikalaku, NDI.” Kaa, ekelekele! “NDI,” Nzambi udi ànukù dîbà dyònsò, wa Cyendelelele awu. Kì mmakeelele, kì mmalaba to, “NDI.” Nwamonu anyi? Nzambi ùdi udi ànukù dîbà dyònsò, Elohim, “NDI” awu. Dîbà adi kwangulabo... Bòbò bàkaavwa bàkèba bwa kuMushebeya dîbà adi.

206 Awu kwambaye ne: “Ee, baataatù beetu’s bààkadyà manà mu cipeela munda mwa bidimu makumi anaayi. Nzambi wàkalòkesha màmpà mu Dyulu ne wàkabàdìisha. Bàvwa bàya mu ekeleeziya ne bàvwa bidimba bîmpè bya ekeleeziya munda mwa bidimu makumi anaayi. Mààmù wanyì mununu awu’s mmufwile anu mu ekeleeziya emu,” ne bikwabo byònsò mushindu awu. “Baataatù bàànyì’s bààkadyà manà mu cipeela munda mwa bidimu makumi anaayi.”

207 Kì Yesu kwambaYe ne: “Kadi’s mbafwè muntu ne muntu.” *Bafwè* mbwena kwamba ne “ditapuluka dya Cyendelelele.” “Mbfawè muntu ne muntu. Kadi Mêmè ndi nnwambila ne, Mêmè ndi Dyâmpà dya Mwoyi didì difùme kùdì Nzambi mu Dyulu. Muntu yèyè mudye Dyâmpà dya Nyuma edi, ùdi ùpeta Mwoyi wà Cyendelelele ne kèna mwa kufwa to. Ne Mêmè nèmjuulè ku dituku dya ndekeelu.” Kaa, mwaneetu, Yèyè kì mmulenga wa menemene anyi?

Yèyè kì mmulenga, mulenga, mulenga anyi?
 Yesu Mukalenge wetù kì mmulenga anyi?
 Mèsù mmamone, maci mmùmvwè, bidìbo
 balondè mu Dìyì dya Nzambi;
 Yesu Mukalenge wetù kì mmulenga anyi?

208 Ncya bushuwa anyi? Tudi tumona Nyuma Wendè wa dijingulula wèndakana munkaci mwetu. Tudi tuMumona wènta bishima ne bimanyinu ne maalu a kukema. Tudi tuCyùmvwà mene cifundìbwe mu Dìyì kaaba aka mene, nwènu nudi nuCimona cishindikìbwe mwaba awu mene. Kaa, ekelekele!

Mèsù mmamone, maci mmùmvwè, bidìbo
 balondè mu Dìyì dya Nzambi;
 Yesu Mukalenge wanyì kì mmulenga anyi?

209 Mu tusunsa tukwabo tubidi, anyi tusatu, nekwenzeke mudimu wà dibatiiza dya mu màyi kaaba aka. Nenku mpindyewu aba bìikalà mwa kubatijiibwa abu, bantu bakaji bàyiilè *eku*, ne bantu balume *elu* luseke. Nenku mpindyewu bantu balume ku dyabakaji dyanyi eku, *eku* ku elu luseke. Ne bantu bakaji lwà *eku*. Nekwikalè bânà beetu bàà bakaji muntwamu ne bilàmbà bimana kulongolola. Nenku kwòkù muntu mulume anyi mukaji kaaba aka mu dinda emu, mwikale mutwishiiibwe ne udi mwitàbùùje Dìyi dya Nzambi, ne mwitàbùùje ne Nzambi ùtu ùshààla mulamate ku mukai Wèndè ne, muntu yèyè munyingalale ne munyingaleelemu ku mpekaatu yèndè yònsò... Mpindyewu, Mashi kî mmanji kwenza cintu nansha cimwe to. To, cidi anu ndiitabuuja dyebe kùdi Nzambi. Ne Nzambi nyawu ùkubiiikila, anu ne: “Fyuu, fyuu, fyuu!” ùkubiiikila wèwè, ki cidi cyèenza nanku awu aci mpindyewu ne: “Fyuu, fyuu!”

“Kacya mèmè ncitukù mwanji kubatijiibwa to.”

“Fyuu, fyuu!”

“Ee, ee, bu mèmè anu mwa kwasa lwendu ne kwenzaku bishiiàngàne’s.”

“Fyuu!” Aci, ki cintu ncyòci aci, asà lwendu, pashiishe—pashiishe udi wenza bishiiàngàne paanyima pàà wèwè mumane kwasa lwendu. Nwamonu anyi? Bikèngela ùkudimukè ùtangilè kùdi ufuma, wàsè lwendu, wamonu’s.

Wèwè udi wamba ne: “Ee, kacya ncitu—ncitu—ncitu mwanji kucimonaku mushindu awu to.”

210 Ee, mwaneetu munanga, ndi muswe bwa ùndeejèku Mufundu wumwe cyanàànà mùdi muntu nansha umwe... Mèmè nu nkàadi mufilèfile cyòci eci kùkaadi bidimu makumi asatu ne cimwe bya mudimu wà bwambi mu nyungulukilu wa buloba bujimà, kumpala kwa beepiskopo ne bakwabo bònsò, mwaba wùkaadiku kacya muntu nansha umwe, muntu nansha umwe mubatiijiibwe mungà mushindu wùdi kawuyi mu Dìna dya Yesu Kilisto to. Kadi muntu yònsò uvwa kàyi mubatiijiibwe mu Dìna dya Yesu awu, bìvwa bikèngela bwa kulwayè kubatijiibwa cyakabidi mu Dìna adi.

211 Nzambi ùtu ne Dìna anu dimwepele, ne Dìna Dyèndè n’Yesu. Yèyè awu ùvwa Mwan’Ende wa balume, Yèyè wàkangata Dìna dya Mwan’Ende wa balume. Nzambi! Mpindyewu, Yesu, mubidi wùvwa mmuntu. Aci tudi bamanye. Ùvwa m’Mwànà wa Nzambi uvwa mubwikila mundidimbi. Mpindyewu twètù katwena twitabuuja mushindu wà ba-unitaires, wùdi bantu bàmba ne Nzambi mmwenze bu mùdi munu wèbè awu awu nansha. Tudi twitabuuja ne kùdi byambii-...byambiiibwà bisatu bya Nzambi. Byambiiibwà bisatu bya Nzambi, mùdi Nzambi mumweneshiiibwe. Kadi kùdi Nzambi umwepele. Nwamonu anyi? Neya bushuwa. Katwena twitabuuja...Tudi

twitabuuja mu—mu . . . Lekelaayi ncileeje mushindu ewu ne, tudi twitabuuja ne Nzambi mmusombèle mu midimu yisatu. Yèyè ùvwa ne mudimu kampanda pa buloba musangu kampanda.

²¹² Mpindyewu, nwênù bakaji yilàayi *elu* luseke, ne nwênù balume yilàayi *elu* luseke, nwênù bàdi munkaci mwa kudilongolola abu. Nenku bàdi munkaci mwa kudilongolola bwa mudimu wà dibatiiza patùdi twakulangana apa.

²¹³ Nenku, mpindyewu, Nzambi ùvwa ne midimu yisatu. Wumwe wà ku yôyi wàkabiikidiibwa ne mbuuTaatu, anyi cipungu cya Taatù; mukwabo wàkabiikidiibwa ne mbuuMwànà; ne mukwabo wàkabiikidiibwa ne Nyuma Mwímpè. Mpindyewu, leelu ewu, ncipungu kaayi—kaayi cidi Taatù munkaci mwa kukwacila mudimu leelu ewu? [Disangisha didi dyamba ne: “Nyuma Mwímpè.”—Muf.] Nyuma Mwímpè. Yèyè ùvwa cinyi mu matuku àdi mapite? [“Yesu.”] Yesu. Yèyè ùvwa cinyi mu matuku àvwa kumpala kwa aci? [“Taatu.”] Kadi cìvwa anu Nzambi umwepele! Ncya bushuwa anyi? Yèyè ùdi Taatù, Mwànà, ne Nyuma Mwímpè, bisatu abi, midimu yisatu ya Nzambi umwepele ayi. Nzambi umwepele!

²¹⁴ Kadi mpindyewu, *Taatù* kî ndîna to, mmmwômò anyi? Ndikù muswe kunukonka. Mpindyewu ndi muswe kunupeesha Maatàayi 28.19, mùdi Yesu mwambe ne: “Ndàyaaku, nukalongeshe bàà matunga ónsò, nubàbàtìzè mu Dîna,” (D-î-n-à) “Dîna dya Taatù. . .”

²¹⁵ Mpindyewu ndi musweku kumona munùdi bamanye bîmpè Mifundu yenu. Nwàngambilaayi pângàapàtukà mu njila. Nenku Yèyè wàkabambila ne: “Ndàayi pa buloba bujimà, nuyiishe cifukiiibwà cyònsò Evanjeeliyo. Ewu udi witabuuja ne ùbàtìjiibwa neasungidiibwe. Ewu udi kàyì wìtabuuja neapiishiibwe. Bimanyinu ebi nebifile aba bàdi bìitabuujà. Mu Dîna Dyànyì bôbò nebìipaté baadémons,” Byònsò abi mbilelela anyi? “nebàakulè mu myakulu mipyamipya, nebàkwatè nyoka ne byanza.” Mpindyewu mèmè nènntùtèlèlè, Maatàayi. . .

²¹⁶ Mpindyewu tèelejàayi. Ndi ndòmbakù mulongi kanà yònsò wa maalu malonda. Mpindyewu eci cidi pa mikaba ya mèyi, eci cìyaaya pa buloba bujimà. Ndi ndòmbakù mulongi kanà yònsò wa maalu-malonda bwa kulwaye kùndi ne kuntwàdilayè Mufùndù kanà wònsò, kantu kafùnda kanà kònsò kàà . . . anyi kî m’Mufùndù to, kantu kafùnda kanà kònsò kàà Mufùndù anyi bwalu-bulonda kanà bwònsò, mvensa kanà yònsò wa maalu-malonda ukààdikù muleeje ne mwena Mishòonyi kana yònsò, muntu kanà yònsò ukààdikù mubàtìjiibwe mu Dîna dya “Taatu, Mwànà, Nyuma Mwímpè” too ne pàakalwà ekeleeziya wa Katolike kutuma dîyi bwa bôbò kucyenza mu Nsangilu wa Nicée. Mpindyewu aci cidi pa mikaba ya mèyi, cìyaaya pa buloba bujimà, cikùdimùnyiiibwe mu myakulu mishiileshiiilàngàne makumi asatu ne mwandamutekete. Mèmè nènku fucile njila

nansha zèzè ufùmina dyàmwàmwà dya mbû. Ncya bushuwa. “Taatu, Mwânà, ne Nyuma Mwîmpè” mbwalu buswika bwa mafi, bwa mashimi bwa Katolike, kî ndibatiiza dya bwena Kilisto nansha. Cya bushuwa! Luther ngwâkalwa muumukile naaci mu ekeleeziya wa Katolike, pamwe ne kateshismu, Wesley kuciitaba kadi kutungunukaye naaci. Kadi edi ndituku dya dimweneshiibwa dya bânà bàà Nzambi, didi maalu masokoka àvwà masokokiibwe kacya ku difuka dya dyulu ne buloba ne cya kumanyishiibwa. Ki dîbà adi ndyôdi edi. Bushuwa.

²¹⁷ Vùlukàayi ne, kakùvwakù muntu nansha umwe mu Bible ukàadikù mubatiijiibwe mu dînà dya “Taatu, Mwânà, Nyuma Mwîmpè” to. Munda mwa bidimu nkama yisatu paanyima pàà lufu lwà mupostolo wa ndekeelu, kakùvwa muntu nansha umwe uvwakù mubatiijiibwe mu dînà dya “Taatu, Mwânà, Nyuma Mwîmpè” to. Bàvwa ne. . . Mémè nkàadi mubale mikanda yònsò yibidi ya *Baataatù Bàà Kumpàlà Kwà Nicée*, ne *Nsangilu Wa Nicée*, nenku kubangila anu apu mpààkenzàbo cìdìbo bàbìikila ne ng’“ekeleeziya wa beena Kilisto wa buloba bujimà” aci apu ne kucivwijabo bulongolodi ne kwenzejabo bantu bònsò ku bukole bwa kubwelamu, ciine cyàkalwà ekeleeziya wa Katolike aci. Mwaku mene *katolike* awu’s wùdi wùmvwija ne “wa buloba bujimà,” ekeleeziya wa beena Kilisto wa buloba bujimà, udi pa buloba bujimà, ekeleeziya umwepele bwa kutwangana pa buloba bujimà. Kadi cyôci cyena Kilisto eci, bàdi bènzeja bantu ku bukole bwa kwikalamu. Mwômò amu mmùdìbo biitàbe, buumùshe Venus kadi kutèeka Mariya. Mbuumùshe Pòlò. . . anyi Jupiter, kadi kutèeka Pòlò. Cìdi anu cya bampaangaanu! Cya bushuwa. Mu cyôci amu mmùdi ekeleeziya wa Katolike mupatukile, ne paanyima pàà bidimu nkama yitaanu. . .

²¹⁸ Bàdi ne dinaya didi munkaci mwa kwenzeka mu Louisville patùdi twakulangana apa, dya *Ben Hur*. Bàvwa ne dya *Mikenji Dikùmi* kî nkwanji kupita ntanta mule to. Ndi njinga, bu bôbò mwa kudyenza, bwa bènzakù dya bidimu cinunu ne nkama yitaanu dya bikondo bya mîdimà adi. Ndi njingaku bwa bààtèeka adi’s. Bidimu cinunu ne nkama yitaanu bya dikengeshangana dya cimpangaanu, mwàkenzejâbo bantu bònsò ku bukole ne kubashebeyabo, kubashebeyabo ne cikisu, kuboowabo. Bàswika ngombe ku eci cyanza ne mukwabo ngombe ku cikwabo cyanza, bàbènzeja bwa kutwabo nkuruse mishiku patupu bàvwa bàsàka ngombe ayi ewu ùya eku ne mukwabo kwàka. Mémè ewu nkàadikù mulengè ne cyanza cyànyi, anu mu Suisse emu, paanyima pàà makunji kùvwàbo bìimana bàbàkòsela ndimì ne bàbàmba ne mbaloji ne bikwabo byònsò. Aci’s ncya bushuwa menemene. Cya bushuwa!

²¹⁹ Ne nyuma umwèumwè awu ùdikù too ne leelu ewu. Mikenji ya mbulamatadi nyidì yimupangisha bwa kajuula mutu. Indilaayi too ne pààpetàye budishikaminyi bwèndè kadi numone. Bible ngudi mwambe nanku. Indilaayi anu too ne

pàaleejàye cidiye, pààpetàye mpùngà wq kucyènza. Nwènu's nudi bafwànyine kwela tukanda bwa kumusungula anu abidi àdi panshi aa, bwa ku dyànyì pàànyì dimanya dyònsò. Nwamonu anyi? Nealwe, nealwe. Kakwenaku mushindu wà kumupangisha to. Yèyè's ùdi ne cya kulwa. Ncya bushuwa. Yèyè ùdi ne cya kulwa, ùlwalwa. Nenku pààlwàye, nwatapaayi anu ntaala nwadimuka. Kadi, mwaneetu, bikèngela wikalè mumanya cintu cimwepele eci, mèmè ndi mumanye Ewu ùndi mwitabùùje. Aleluuyah! Mutungunuke anu ne kwenda kuya. Nwamonu's. Ki cyòci aci.

220 Kùvwa cikondo cìvwà—cìvwà mufundi mwine ewu, pàmvwà mwambile mufundi wa Lam...Lamsa—Bible wa Lamsa, pààkatàngilàye e kumona cimanyinu cya kale cya Nzambi aci, anu menemene cyòci aci menemene, tutobà tukese tusatu mu cyòci aci, mèmè kwamba ne: "Twàtwa ki tunganyì?"

Yèyè kwamba ne: "N'Nzambi awu mu byambiibwà bisatu."

Mèmè ne: "Bu mùdi Taatù, Mwànà, ne Nyuma Mwîmpè anyi?"

Kuntangilaye. Kwambaye ne: "Wèwè udi witabuuja aci?"

Ki mèmè ne: "Eyowa's, mukalenge."

221 Kwambaye ne: "Mvwa mumone dijingulula adi diloolo adi, mèmè kudyambidila ne wèwè udi muprofeta wa Mukalenge." Yèyè ne: "Nzambi akubeneshe." Kungeelaye diboko kunshingu, kwambaye ne: "Bwa mpindyewu kaayi ngàamanyì ne mmwômò." Yèyè ne: "Beena Amerike aba kî mbamanyeku cintu to." Yèyè ne: "Kî mbamanyeku kantu nansha kamwe to." Yèyè ne: "Bòbò bàdi bàteeta kwangata Mukanda wà ku Esete bwa kuWuvwija Mukanda wà ku Wesete. Kî mbamanye nansha Bible to." Yèyè ne: "Kakwena dîngà Dîna nansha dimwe dipèeshiibwe mwinshi mwa Dyulu, dîngà Dîna nansha dimwe, bwalu bantu bònsò bàkaadiku babàtiijibwe bàakabàtiijibwa mu Dîna dya Yesu Kilisto. Cintu pààci ne mbaapersona basatu mu Mvidi Mukulu umwe kacitukù to." Nenku awu m'Mwaneetu Lamsa, Docteur Lamsa, mukudimunyi wa Bible wa Lamsa awu, udi mulunda wa katàpùlà-katèèkà wa Esehower ne wa badiplomates banene bònsò bàà pa buloba, ne bikwabo byònsò, kungeelaye maboko kunshingu, kwambaye ne: "Dîngà dituku bàadyàkukwasa cingoma bwa bwalu abu. Kadi," mwàkambàye, "wavùluka ne, bantu bònsò abu bàtu bàfwa bwa kiipàcila kampanda."

222 Mèmè ndi muswe kwikala mùvwà Peetèlò wa kale pàvwàye musòmbe mu buloko apu. Kùvwa nsongàalùmè wa citende muntwamu ne mwikàle mubinduluke yònsò. Ki kwambaye ne: "Kaa, ncilumbu kaayi?"

Yèyè ne: "Udi mumanye ne nebakushebeye anyi?"

Peetèlò kwambaye ne: "Eyowa's."

Awu ne: “Ee, s’ukàadi pa kufwa leelu ewu.”

Yèyè ne: “Eyowa’s.”

Awu ne: “Ee, bàdi—bàdi . . . kwêna ne bwôwà tô?”

Yèyè ne: “Bwàlà.”

Awu ne: “Wèwè udi ne cya kwikala umwe wa ku bàdìbo bàbìikila ne mbeena Kilisto abu.”

Yèyè ne: “Eyowa’s.”

Awu ne: “Cìdì cyenzèke ncinyì?”

²²³ Ki kumulondelaye, kusòmbelayè panshi ne kumulondelaye bwalu abu. Kadi pàvwà muyiiki awu mutungunuke apu, kufikaye kundekeelu, kwambaye ne: “Kadi’s mvwa mwa kwikala mushààle mudishikamine mu dinda emu. Nunku ndi muye mukashààle wa ku dimwe dya ku mangumba àbò awu ne mutungunuke anu ne kwikala ne mwoyi, wamonu’s. Mvwa mwa kwikala mushààle mudishikamine. Kadi pàvwà mpatukila ku ciibi cya cimenga, mèmè kumona Kampanda wènda ùlwa, wènda ùbwela. Mèmè kumanya ne Ùvwa Nganyì. Mèmè kwamba ne: ‘Mukalenge, Uyààya kwèpi?’ Yèyè kwamba ne: ‘Ndi ngaalukila nye bwa kupoopediibwa cyakabidi pa nkuruse.’” Yèyè ne: “Mèmè kwalukila buludi’s.”

²²⁴ Anu pa diine díbà adi kwambabo ne: “Udi dîna ne n’Simona Peetèlò nganyì?”

Yèyè ne: “Mmèmè ewu!”

Awu ne: “Tukàadi badìlongòlòle bwebe wèwè.”

Yèyè ne: “Nwènù’s ki bândì mwindìle aba.” Pèndè ùmba ùpàtuka.

²²⁵ Nsongààlùmè awu kumulengaye pa dikaaya, kwambaye ne: “Anjì indilabi kakese tǔng, Simona; ndi pàanyi ngiitaba Nzambi awu! Ne patùdì twakulangana apa ncyèna ne bwôwà to; dîna didi dilondà dìikalè dyànyì mèmè.” Ncya bushuwa. Aleluuyah!

Mmùtùngùnùke anu . . . Ùdi ùzòlòloka mashi,
eyowa, ùdi ùzòlòloka mashi,

Evanjeeliyo ewu wa Nyuma Mwîmpè ùdi
ùzòlòloka mashi,

Mashi a bayiidi bàakafwìlà Bulelela abu,
Evanjeeliyo ewu wa Nyuma Mwîmpè
mmutungunuke anu ne kuzòlòloka mashi.

Wa kumpala wàkafwìla ndongamu ewu wa
Nyuma Mwîmpè,

Ùvwa n’Yone Mubatiji, kadi yèyè wàkafwà bu
muntu;

Pashiishe kulwaku Mukalenge Yesu,
kuMupoopelabo pa nkuruse,

Yèyè wàkayiisha ne Nyuma ùvwa mwa
kusungila bantu ku mpekaatu.

Kùdi Peetèlò ne Pòlò, ne Yone wa kwa Nzambi
 awu,
 Bòbò bààkafila myoyi yabo bwa Evanjeeliyo
 ewu wàmòna mwa kukenkesha;
 Bààkasambakaja mashi àbò, mwénzèlèbo kùdi
 baprofeta bàà kale,
 Bwa Dìyì dilelela dya Nzambi dyàmòna mwa
 kwambiibwa ne meeji matooke.
 Kùdi misuuka mwinshi mwa cyoshelu, yèla
 mbila ne: “Too ne ku dibà kaayi?”
 Bwa Mukalenge kunyookaYe aba bàdì benze
 bibi; (Tèèlejääyi!)
 Kadi nekwikalè bakwabo kabidi bààfilà mashi
 a myoyi yabo
 Bwa Evanjeeliyo ewu wa Nyuma Mwîmpè ne
 nkwaka wendè mukunze bu mashi awu.
 Ùdi ùzòloloka mashi, eyowa, ùdi ùzòloloka
 mashi,
 Evanjeeliyo ewu wa Nyuma Mwîmpè ùdi
 ùzòloloka . . . mashi,
 Mashi a bayiidi bààkafwilà Bulelela abu,
 Evanjeeliyo ewu wa Nyuma Mwîmpè ùdi
 ùzòloloka mashi.

226 Anu Mufundu wumwe cyanàànà kumpala kwa twètù kuya:

*. . .nenku bôbò kwambila Peetèlò ne . . .bakwabo bàà
 kùdìbo ne: Balumyana ne bânà beetu, citùdì ne cya
 kwenza ncinyi bwa twètù kusungidiibwa?*

*. . .Peetèlò wàkabàmbila ne: Nyingalalaayi, muntu ne
 muntu wa kunùdì ne nubatiijiibwe mu Dìnà dya Yesu
 Kilisto bwa dilekelediibwa dya mpekaatu wenù, nenku
 nwênù nenupete kupà kwa Nyuma Mwîmpè.*

*Bwalu mulayi wùdi kunùdì, ne kùdì bânà beenu
 balela, ne kùdì aba bàdì kule, mu búngì bwònsò
 bwàbìikilàbo kùdi Mukalenge Nzambi wetù abu.*

227 Mukalenge anubeneshe mpindyewu. Patùdì twenda tuumuka mu njila apa, nudi mwa kubandilaayi dibatiiza patùdì . . .? . . .



DITÈÈKIIBWA 3 LUA60-0522M
(Adoption ³)

DILONDANGANA DYÀ MALONGESHA PA DITÈÈKIIBWA

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 22 a ngondo mwithânù, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org